


ENLEVEMENT

 . . .lukutakanu ya nene awa na—na Yuma, ya kele bweso ya nene na kuzwa lubokilu yayi na kuvutuka dyaka. Beto kuzwaka ntangu mosi ya mbote, ntangu ya nsuka awa. Mpe kuna ntangu mu bakulaka ti mu zolaka vutuka dyaka, ya me sala munu mbote mingi, samu na kuwa bimbangi mpe bandinga yayi me katuka na bantu, mpe ya ke yangidika beno fioti.

² Billy me tuba na munu ti mpangi ya bakala yina ya Las Vegas, yina zolaka sala lukutakanu kuna na kimvuka mosi yina ya nene, yandi zolaka mona munu na mbala mosi na manima ya kisalu me kuma na nsuka awa. Beto ke na ntangu mosi, yandi ke tuba, ti beto lenda kota na malembe, kuna na Ngonda ya ntete, na ntwala ya lukutakanu ya Phoenix, beno me mona, samu na kukwisa na Las Vegas. Mpe na yina beto ke zolaka ntangu nionso kukuma kuna.

Mu banza ti Mpangi Wilson vwandaka kuna, ntama mingi, to yandi zolaka vwanda kaka kuna. Mpe yandi—yandi lombaka munu na kukwisa, yandi na Mpangi-kento Wilson. Mu kuzwaka ntangu ya mbote ve, na yawu mu banza ti yayi ke vwanda ntangu yina mu lendaka kwiza.

³ Beno ke mona kaka Billy Paul to Mpangi Roy Borders. Mu banza ti yandi kele awa kisika mosi kuna. Muntu mosi tubaka ti Mpangi Roy vwandaka awa. Mpangi Pearry, Lee, to konso muntu yina, bawu ke vwanda na lenda ya kutuba na nge. Beno yidika kaka bilumbu yina beto ke kwisa.

⁴ Ntangu yayi, mu me mona balongi mingi awa, ntama mingi ve, na yina mu ke na kiese mingi na kukutana na bampangi ya munu. Mu zolaka kuzwa ntangu, samu na kukwenda na yinzo na beno, samu ti mu zaba ti beno kele na milambi ya kulutila mbote na kati ya yinsi. Ya kele mbote.

⁵ Mpe ntangu yayi, Mpangi Pearry kuzwaka mambu zole, na nokokila yayi, na zulu ya yandi. Yandi vwandaka na mambu zole ke telemina yandi ntangu yayi. Mosi ya bawu, vwandaka kuzenga microphone yina, kuna. Na yina, beno kele—beno kele yina zaba dyambu samu na yawu, Mpangi Pearry. Mu banza ve ti nge zabaka kieleka dyambu. Kasi beno. . .Muntu mosi vwandaka kubama na kutuba. Yina vwandaka muntu mosi ya mbote.

⁶ Mpe na yawu kuna, dyaka, yandi kwendaka kuna mpe vwandaka zonza. Yandi tubaka, “Tala!” Yandi tubaka na Mpangi Collins to bayankaka ya bawu. Yandi tubaka, “Madia ya nokokila vwandaka mbote. Kasi,” yandi tubaka, “Mu ke tuba na nge,” yandi tubaka, “bakala yina fwana vwanda Espagnol to kima mosi, to Mexicain. Yina vwandaka pili-pili ya ngolo mingi

yina mu me mekaka ntete ve.” Yandi vwandaka landila mutindu yina, mpe yandi zabaka ve yandi vwandaka tuba na mfumu.

Yandi tubaka, “Mu kele mfumu.”

⁷ Ya kele Texas, samu na beno. Beto ke sungika yandi, awa na Arizona, na manima ya mwa ntangu fyoti, (mutindu yina ve?), kana yandi bikana pene-pene ya beto.

⁸ Kieleka ya kele mbote na kuvwanda awa! Mpe mu banza ti mambu yina ke wakana ve mutindu bansaka, kasi talanaka mutindu ya kusekisa. Na yina, Mfumu Yandi mosi vwandaka talana mutindu ya kusekisa, beno zaba. Yandi tubaka, “‘Hérode,’ beno kwenda tuba na kibulu yina,” beno me mona, “bubu yayi mu ke basisa—ke basisa bampeve ya yimbi; mbasi mu me kuma ya kulunga.” Na yawu, Yandi vwandaka talanaka mutindu ya kusekisa. Mbote, ya ke nyongisa beto ve, mu banza ve, mbala mosi na mwa ntangu fyoti.

⁹ Mpe ntangu yayi mwa ntangu me luta fioti. Mpe, na bambala mingi, mu—mu ke longaka pene ya bangunga yiya. Na yina yayi, na kuzabaka ti yinzo ya lusambusu ya mpangi-bakala mpe mpangi-kento awa, lukutakanu ya nene, beto ke zenga nzila yina, na nkokila yayi. Mpe kaka. . . Mu tubaka na Terry. Mu tubaka. . .

Yandi tubaka, “Yinki kele. . . Beto fwana tula bande ya bangunga zole?”

¹⁰ Mu tubaka, “Ve, Terry. Yayi kele feti.” Mu tubaka, “Kaka pene ya baminuti makumi tatu to makumi yiya, mu ke zonza na bantu kima mosi.” Ti, mu ke mekaka, na kutala, konso ntangu, na kuzabaka yawu.

¹¹ Ntangu mu vwandaka mwana-bakala, bantu vwanda kwisa samu na kuwa munu samu ti mu vwandaka mulongi ya bakala ya ntwenya, bakala ya ntwenya, mwana-bakala ya ntwenya. Mpe bawu vwandaka tuba, “Mbote, Billy Branham, nge zaba, nge kele kaka mwana ya fyoti, ata mbala mosi ve ti nge me lutaka na lukolo, mpe nge me longukaka ve.” Mpe ba vwandaka kwisa samu na kuwa bandinga ya munu ya bitini, Kingesi ya munu ya Kentucky, mpe—mpe na yina ba. . . “hits,” mpe “hain’ts,” mpe “totes,” mpe “carry” ya munu.

Mutindu na mosi ya balukutakanu awa ntama mingi ve, bawu tubaka, “Beto nionso ke telama mpe ke yimba nkunga ya yinsi.”

¹² Mu telamaka mpe tubaka, “Samu na yinzo ya munu ya ntama ya Kentucky.” Yina vwandaka yinsi mosi kaka yina mu zabaka, na yina ya vwandaka nkunga ya yinsi, na mutindu yina me tala munu.

¹³ Na yawu ntangu yayi, na manima beno me kula, na yina, beto. . . beno me kota, beno fwana kuzwa kima ya kulutila yina. Beno me mona? Beto ke baka. . . Paul tubaka, ti, “Ntangu mu

vwandaka mwana ya fyoti, mu vwandaka zonza mutindu mwana ya fyoti mpe vwandaka banza mutindu mwana fyoti.” Beno ke sala mutindu mwana ya fyoti. Kasi mutindu beno ke kuma mbuta, na yina beno ke banda, na kusala bitambi ya beno ya ntete, mpe kukondwa ngolo mpe beno ke kubwa, mpe kutelama mpe kumeka dyaka yawu. Na manima beno, na manima ya mwa ntangu fyoti, beno ke kuma mingi na nzila ya kusungama. Mpe ya kele yina beto fwana sala, mutindu basoda ya kulunsi. Ntangu yayi kele ntangu ya kutambula nzila ya kusungama, kaka na yisi ya bala-bala yina na Nkembo.

¹⁴ Mu ke kwikila ti beto ke na kuzinga samu na kusukisa masolo ya yinza yayi. Ya kieleka mu ke kwikila ti Nkwizulu ya Mfumu me belama, ntangu yankaka, kulutila yina beto ke banza. Na yawu ntangu yayi, kaka pene ya baminuti makumi tatu ya ntangu ya beno, to kima mosi, Mu ke zola benda bukebi ya beno na Masonuku yina mu ke zola sadila samu na dilongi mosi, mpe—mpe kutala dyaka na bayankaka awa. Mu . . .

Mu vwandaka ya kuvwanda na yinzo, kilumbu yina, mu vwandaka banza na dibanza yayi. Na yina mu banzaka, “Mbote, mu zaba ve, mu ke tuba na Masonuku yayi nionso. Mu ke baka kaka kitini ya Yawu, mpe kaka samu na mwa balukutakanu yayi ya nkufi mutindu beto ke vwanda na yawu na nkokila yayi.” Mu zola kutuba kima mosi, na yina beno ke na kubaluka na Psaumes. Ya ntete . . . Psaumes 27, mu zola banzila tanu ya ntete, kutanga.

¹⁵ Ke zola kutuba yayi, samu na yina me tala makapu ya Bantu ya Mumbongo ya Nsangu ya mbote ya Muvimba ya Bantu ya Mumbongo.

Mpangi ya munu Pears vwandaka zonzila na babuku, mpe nyonso yina, mpe babuku ya malu-malu yina kele na bawu. Bantu yikwa ke bambuka moyo ntangu beto kuzwaka bande, mpe longaka yawu awa na Phoenix, na mosi ya balukutakanu, ya *Batata, Wapi Ntangu Yayi?* Ntangu yayi, yina vwandaka mbandukulu ya buku yina, beno me mona, ntangu bayayi . . . yayi kusalamaka.

¹⁶ Ya kele na nsiamisa mingi ya kimpeve ya Ndinga ya Nzambi yina me sonama, ya ngunga yayi, samu ti kima mosi ve ke belama na beto ntangu yayi. Beto kele kaka . . . Ya kele kieleka mingi. Bima yina beno . . . Ya ke yitukisa, samu na beno, kaka samu beno zaba ti yina kele kieleka yina ke na kusalamaka. Mingi ya beno, banzenza, mu banza, ke kuwaka bantu yayi kutelama mpe kusala—kusala milabu yayi, na yina me tala, “Nsangu ya ngunga yayi,” mpe nyonso yina. Yina bawu ke na kukwenda, kele nsilulu ya Nzambi ya ngunga yayi, ti Yandi silaka yina Yandi ke sala. Mpe beto ke mona Yandi landila Masonuku na kusiamisaka kaka kieleka yina Yandi tubaka ti Yandi ke sala, na mutindu mosi. Ba zabisaka na ntwala, ya ke vwanda kaka ya kulunga, konso ntangu, samu ya kele Nzambi ke tuba yawu.

¹⁷ Kana muntu, mu ke kipe ve nani yandi vwandaka, ke meka na kusala luzabusu na ntwala ya mutindu yina, ya kele na siansi mosi na kati ya mafuku kumi. Kana muntu mosi tubaka na beno ti *kima* mosi ke salama, ya ke—ya ke salama na *ntangu* mosi; mosi na kati ya ba-million kumi. Mpe na manima *kisika* ya ke salama, ya ke vwanda na siansi mosi na kati ya nkama ya mafuku.

Mpe na manima *ntangu* ya ke salama, ke landila mpe ke landila, mpe *mutindu* ya ke salama, mpe *yina* ya ke salama, mpe nyonso yina, ya kele kaka na zulu ya dibanza. Ntangu beto ke mona yawu na mutindu ya kulunga, konso ntangu mpe konso ntangu, na yina ya kele Nzambi.

Mpe kuna beto ke vutuka kaka na Masonuku. Ya lendaka monana nzenza samu na beto. Kasi beto ke vutuka na Masonuku, kukondwa kuzaba kisika ya kutala, mpe Mpeve-Santu ke basika mpe ke tula kaka Ndinga nyonso kintwadi, ke sala foto kuna samu na kutalisa beto kaka ngunga yina beto ke na kuzinga. Beto ke na kusoba bansungi.

¹⁸ Beto kele—beto kele na nsongi. Ya kele mpasi ve samu na muntu mosi ntangu kitungi bayinzo ke tunga nsongi, na kulandila kutula biliki na ndonga. Ya ke banda, muntu nyonso ke tula babiliki kaka kuna na ndonga mosi, mutindu dénomination mosi ke banda, mpe ke banda na kusala kima mosi ya ke banda na kulanda ndonga mosi, ya kele mbote mingi. Kasi, ntangu beno ke kuma na bakubaluka yayi, kisika beno fwana vutuka samu na kubaka nzila yankaka!

Ntangu yayi, Nzambi ke na kutunga ve kibaka. Yandi ke na kutunga yinzo, beno me mona, mpe ya kele na bakuzenga-zenga mingi mpe bakubaluka-baluka yina Yandi zabisaka na ntwala awa na kati ya Biblia. Mpe kubaluka-baluka, muntu nyonso zolaka meka na kusala kubaluka-baluka, kasi ya fwana vwanda landila manaka. Kana ya kele ve mutindu yina, ba fwana panza yawu diaka.

¹⁹ Na yawu beto—beto ke kumisa Nzambi samu na bumbote ya Yandi mpe kubundana ya beno bantu, mpe myelo ya kuzibuka yina Mfumu me pesa beto, mpe na bantu ya mumbongo yayi. Mu ke ndimaka ntangu nyonso ti mu—mu ke kwikilaka ve na . . . Mu ke kwikilaka ti bantu kele na ba-denomination. Kasi mu kele ve na ntangu mingi ya kulongisila ba-denomination, samu ti mosi na mosi ke tungaka lupangu pene-pene ya yandi mosi.

²⁰ Mpe—mpe kaka mutindu, mu banza, ya vwandaka mwa kutuba ya Mpangi David, samu ti yandi vwandaka sansa mwa mabata, mpe tubaka nzadi me basika. Mpe konso dibata, beno zaba, bawu vwandaka zola kubundana mosi na yankaka, mpe bawu lendaka ve kusala yawu samu ti bawu nyonso vwandaka ya kuzungudila na lupangu. Kasi ntangu masa ke mata mingi, ya ke matisa kaka mabata na ngaanda ya lupangu.

Na yawu mu—mu banza ti ya kele mutindu ya kusala yawu. Masa ke na kukwisa, beno me mona, mpe beto lenda basika na yinzo ya bansaka mpe—mpe kubundana mosi na yankaka, beno zaba, beno kele na zola ya kieleka ya Klisto na kati ya bantima ya beto.

²¹ Mpe Bantu ya Mumbongo ya Nsangu ya mbote ya Muvimba me vwanda kisika ya kupema samu na munu. Samu ti, bambala mingi. . . Mu kele na bampangi ya babakala, bampangi ya babakala ya mbote na kati, mu banza, konso denomination yina mu me kutanaka ntete: Ba-Presbytérien, ba-Luthérien, ba-Baptiste, ba-Pentecotiste, mitindu nyonso ya bifwanukusu ya ba-Pentecotiste, Dibuundu ya Nzambi, mpe ba-Nazaréen, ba-Pelerin de la Sainteté. Bampangi ya babakala ya mbote, bisika nionso. Kasi, bambala mingi, bawu lenda ve kuzwa munu na kimvuka ya bawu, samu ti, beno me mona, ve ti bawu ke kwikilaka yawu ve, kasi, beno me mona, ya ke katula bawu na denomination ya bawu. Mpe ntangu beno ke sala yawu, kieleka, ya—ya ke sala yawu.

²² Awa ntama mingi ve, ya vwandaka na mpangi mosi ya bakala ya Methodiste yina kwisaka na munu, mu ke bokila yandi ve. Bakala mosi ya mbote, yandi vwandaka sonika mabanza na zulu ya kubeluka ya Kinzambi, mpe yandi kwisaka na munu samu na mwa—mwa nzonzolo mosi. Beto vwandaka kuna mpe vwandaka solula mwa ntangu fioti. Yandi tubaka, “Kima mosi kaka beto ke telemina nge, nge kele ya kukangama na zulu ya ba-Pentecotiste yina ntangu nionso.”

Mu tubaka, “Na yina, bika ti dibuundu ya ba-Methodiste kusimbisa yawu. Mu ke kwisa.”

Ya vwandaka mutindu yankaka. Beno me mona? Yandi—yandi tubaka, “Mbote, ya kieleka, mu—mu kele ve dibuundu ya ba-Methodiste. Mu kele kaka ya bawu.”

²³ Mu tubaka, “Yawu yina. Beno me mona? Bawu kele bayina, ba-Pentecotiste, kele bayina ke zibula mielo ya bawu. Beno me mona? Ya kele samu na bayina mu lenda kwenda. Mpe mutindu mingi ya bawu yina ke zibula, mbote, beto kele pene-pene na kukota.”

Mutindu na Apocalypse, kapu ya 3, me tuba, “Mu ke telama na kielo mpe ke konkota. Kana muntu nyonso ke zibula kielo, mu ke kota mpe ke dya.” Mpe ya vwandaka Yesu. Beto nyonso zaba ti ya vwandaka Klisto, mpe Yandi kele Ndinga. Ya kele kieleka. Yandi kele Ndinga.

²⁴ Mpe na yina Bantu ya Mumbongo ya Nsangu ya mbote ya Muvimba vwandaka mwa kisika ya kupema kisika beto lendaka vukana kintwadi. Ata dibuundu mosi ve ke simbisa yawu. Bawu nyonso, kintwadi, bantu na ngaanda ya mabuundu, mpe beto ke vukana kintwadi mpe kubundana, ke vukana na yinza, bisika nyonso.

25 Mpe mu me sadisaka na kuvwandisa mingi, mingi, bimvuka mingi, na yinza ya muvimba, ya Bantu ya Mumbongo ya Nsangu ya mbote ya Muvimba. Mu ke vutula matondo samu na bweso yina ba pesaka munu. Na kati kuna, bantu ya mumbongo ke simbisa yawu. Na yina, mabuundu nionso, bawu—bawu zola kwisa, na mutindu nionso.

Kasi, na yina, kana. . . Mu zola ata mbala mosi ve kumeka na kubenda muntu na dibuundu ya bawu. Beno bikana kaka na dibuundu ya beno mpe beno mwangisa Nsemo. Beno me mona? Beno vwanda Muklisto ya kieleka. Pasteur ya beno ke sepela na beno. Santu ya kieleka, ya kukwikama, ya kieleka, muntu nyonso yina ke kwikilaka na Nzambi ke sepela na muntu mutindu yina. Yinga.

26 Ntangu yayi, mu ke tonda mpangi ya bakala yayi awa, mpe kento ya yandi, mpe kimvuka yayi, samu na bweso yayi. Mpe bika ti kimvuka yayi kukula. Bika ti balusakumunu ya Nzambi kuvwanda na zulu ya yawu, mpe kuvwanda kisadilu na maboko ya Nzambi, samu na kuvulusa bankama mpe bankama ya bantu ntete Nkwizulu ya Mfumu; mpe mu ke tuba yawu dyaka samu na bimvuka nionso yankaka to bimonikisi ya bawu yina kele awa.

27 Na Buku ya Psaumes, ntangu yayi, mu zola kuzonzila na dilongi ya kieleka ya ngitukulu, na nkokila yayi, kaka samu na mwa ntangu fyoti. Mu kele na Masonuku ya kusonama awa. Mpe—mpe mu banzaka ti mu banza ti, na nkokila yayi, mu zolaka tuba na zulu ya kima mosi ya luswaswanu. Kasi, beno me mona ntangu kukwenda, na yina, mu zolaka ve kubikana ntangu ya yinda mutindu yina, na yawu mu me baluka kaka awa mpe me kuzwa mwa Masonuku ya kulutila. Mpe mu zola tubila dilongi yayi: *Enlevement*. Beno me mona?

28 Ntangu yayi, beto ke kwikila ti ya ke vwanda na *Enlevement*. Baklisto nyonso ke kwikila yawu, ya kele mitangi ya Biblia, ke kwikila ti ya ke vwanda na *Enlevement*.

29 Mpe ntangu yayi samu na kutanga mwa dibanza, beto ke tanga Psaumes 25. Mu zola kutuba. . . Beno lemvokila munu. Psaumes 27, 1 tii na 5.

MFUMU kele nsemo ya munu mpe mpulusu ya munu; mu ke vwanda na boma ya nani? MFUMU kele ngolo ya luzingu ya munu; mu ke vwanda na boma ya nani?

Ntangu bantu ya yimbi, ata mpe bambeni ya munu mpe minyongisi ya munu, ke kwiza kunwanisa munu samu na kudya nsuni ya munu, bawu ke bula disakuba mpe ke kubwa.

Kana makesa kwisa pene-pene ya munu samu na kunwanisa munu, ntima ya munu ke vwanda na boma ve: Kana mvita kubwila munu, na ntangu yayi mu ke vwanda na kivuvu.

Kima mosi mu ke lomba na MFUMU, yina mu ke sosa; ti mu ke zola zinga na yinzo ya MFUMU bilumbu nyonso ya luzingu ya munu, samu na kutala kitoko ya Mfumu, mpe kulomba tempelo ya yandi.

Samu ti na ntangu ya mpasi yandi ke bumba munu na kati ya kisika ya lukengolo: mpe yandi ke bumba munu na kinsweki ya tabernacle ya yandi; yandi ke tula munu na zulu ya ditadi.

Bika ti Mfumu kubwela balusakumunu ya Yandi na ntangulu yayi ya Ndinga ya Yandi.

³⁰ Ntangu yayi, bubu yayi, na kuzonzaka na zulu ya dilongi yayi, mpe ntangu yayi bayankaka ya beno lendaka vwanda na dibanza ya kuswaswana, banzila yina mu ke baka. Kasi bantu yikwa na kati awa ke kwikila ti Biblia ke longa ti ya ke vwanda na Enlevement ya Dibuundu? [Dibuundu me tuba, “Amen.”—Mu.] Yinga, tata. Ya kele kieleka, kieleka, kuzanguka ya Dibuundu. Kana beno kele Methodiste, Baptiste, Presbytérien, to muntu nyonso yina beno kele, Pentecotiste, ya ke vwanda na kuzanguka.

³¹ Mpe mu banza ti, na nzonzolo yankaka, mu—mu ke na kumeka kaka ve na kutelama awa samu na kutuba kima mosi ti mu banza ti mu ke zola kuyangidika bantu. Mu kele ve ata fyoti muntu yina zaba dyambu ya yawu. Mu zola mata awa mpe kutuba kima mosi mutindu mu me twadisama na kutuba yawu, ti mu banza ti ya ke vwanda lusalusu samu na beno, kima mosi yina lenda nata na ntuala nzingulu ya beno na Nzambi, kana beno kele Muklisto; mpe kana beno kele ve Muklisto, beno sala ti beno vwanda na nsoni ya beno mosi, ti beno ke kuma Muklisto. Mpe ya kele lukanu yina mu ke mekaka ntangu nyonso na kukanga mabanza ya munu, mutindu Mfumu ke twadisa munu.

³² Ntangu yayi, ba me kebisa beto, ti ba seka Malongi ya Yayi na bilumbu ya nsuka. Kana beno zola, beto tanga kaka Yawu, kaka minuti. Ya kele na Zole ya Pierre, kapu ya 3. Beto tanga kaka mwa ntangu fyoti na yayi. Kapu ya 3, mpe banzila ya 3 mpe ya 4. Beto tala kana yayi kele ve kieleka.

Na kuzabaka yayi ya ntete, ti ya ke kwiza na bilumbu ya nsuka bantu ke sekaka bayankaka, ke tambula na manima ya bansatu ya bawu mosi,

Mpe na kutubaka, Wapi nsilulu ya nkwizulu ya yandi? . . . kubanda batata kufwaka, bima nyonso ke landila mutindu yawu vwandaka katuka mbandukulu ya lwangulu.

Samu ti bawu zola zaba yawu ve, ti na nzila ya ndinga ya Nzambi mazulu vwandaka na ntangu ya ntama, mpe ntoto yina basikaka na maza mpe ma- . . . mpe na kati ya maza:

Na nzila ya bima yayi bayinza yina...vwandaka, dindaka na kati ya masa:

³³ Ntangu yayi beto ke mona ti, ya kele samu na yina ti ba ke yinaka dilongi yayi, ya kele samu ti profete awa me tuba yawu na bilumbu yayi ya nsuka baseki ke kwisa na kutubaka bima yayi. Beno me mona? Ba tubaka yawu na ntwala, ya kele samu na yina bantu ke na kusala bubu yayi mutindu bawu ke na kusalaka. Na yina, ya kieleka beno ke na kuingila yawu, samu ti Biblia me tuba yawu. “Na bilumbu ya nsuka bawu ke vwanda bantu ya lunangu, bantu ya lufundu, bantu ke zolaka biese ya zinza kulutila Nzambi; bantu ya kukondwa kyadi, bantu yina ke zonza yimbi na zulu ya bampangi, ke lenda ve na kukutika banzutu ya bawu, bambeni ya bayina kele mbote; ke lakisa mutindu ya kinzambi, mpe ke manga ngolo ya yawu: kwenda ntama na bantu yina.” Beto lenda sosa kumekula ya Kieleka? Ya kieleka.

³⁴ Ntangu Moise kwendaka kuna na Egypte, samu na kuvulusa bana ya Israel, na nkawa mosi kaka na diboko ya yandi samu na kusiamisa, na Nzambi ya Mazulu na manima ya yandi, yandi salaka kimangu. Kuna me kwiza bamekudi na manima ya yandi, mpe ke sala kima mutindu mosi yandi salaka. Beno me mona? Ntangu yayi, ba kwisaka ya zole, na manima yandi salaka yawu ntete. Na manima ba kumaka pene-pene, samu ba vwandaka mekula bawu na manima ya yina yandi salaka, na kumekula yina ya kisina. Beto ke mona yawu.

Mpe ntangu yayi beno ke tuba, “Mbote, yina vwandaka na bilumbu ya Moise.”

Kasi Masonuku mosi ke tuba ti bawu ke kwiza dyaka na bilumbu ya nsuka. “Mutindu Jambres na Jannes teleminaka Moise, mutindu mosi bantu yayi ya dibanza ya kubela samu na yina me tala Kieleka.” Beno me mona? Bakumekula, bima ya mutindu na mutindu samu na kutalisa bantu mpasi. Mpe na yina kana . . .

³⁵ Enlevement yayi yina ke salama, mpe nyonso yina Nzambi kele na yawu na nzila ya Ndinga ya Yandi, ya kele ntangu nyonso na kima mosi ke basika samu na kutalisa Yawu mpasi kana bawu lenda. Ya kele—ya kele—ya kele lukanu ya Satana na kusala yawu.

³⁶ Mutindu mpangi-bakala yayi awa, yina katukaka na lukutakanu kuna na Las Vegas, yandi tubaka, “Satana tubaka ti yinza vwandaka luyalu ya yandi, mpe—mpe yina vwandaka quartier général ya yandi kuna.”

Mu zaba ti Satana kele nzambi ya yinza yayi. Konso yinsi na yisi ya mazulu me twadisama na yandi. Kieleka. Yinza yayi kele ya Satana, kasi Yesu ke yala yawu. Yandi pesaka yawu na Yandi kilumbu mosi. Mpe Yandi mangaka yawu, kasi, Yandi tubaka . . . samu ti Yandi zabaka ti Yandi ke vwanda Kibyadi ya yawu na bantangu ke kwiza.

³⁷ “Baseki.” Beto baka kaka mwa ntangu fyoti na zulu ya ndinga mosi yina, ntete beto kwenda ntama mingi. Baseki!

Mu vwandaka tanga mukanda mosi, pene ya basabala zole me luta, na Tucson, ti kisika muntu mosi ya Kingelesi katukaka na Angleterre salaka nsamunu mosi. Ya kele na bayintu ya nene na zulunale, ti kukomama na kulunsi ya Mfumu ya beto Yesu Klisto vwandaka kaka dyambu ya luvunu, kati-kati ya Pilate mpe Yesu, ti Yandi kwizaka samu na kusala . . . kaka samu na kusala Yandi mosi kima. Mpe ya kele ve na mutindu ti beto lenda telemina yawu, samu ti bima nyonso ya Nzambi fwana kuzwa na nzila ya lukwikilu. Beto fwana kwikila yawu. Ntangu yayi, yandi kwendaka na ntuala samu na kupesa ntendulu ya mutindu yina zolaka salama.

³⁸ Awa ntama mingi ve, na yinsi yina ya nene, Londres, na Angleterre, mu zola tuba, kisika John Wesley mpe Charles, mpe mingi ya milongi ya nene yina ya bilumbu ya ntete, Spurgeon mpe bayankaka, longaka Nsangu ya mbote na kati ya bibumbulu ya bambuma mpe bisika nyonso kuna. Bawu mangaka nsangu ya kilumbu ya bawu, mpe talaka yina bawu kele na kati ya kilumbu yayi.

Ya kele kisika Mpangi Williams mpe bayankaka kele na nkokila yayi. Ya kele mosi ya bayinsi ya kulutula yisi na kati ya yinza. Mu me vwandaka na yinza ya muvimba, kasi mu zaba ve kima yina kele ya makangu mingi mutindu Angleterre. Ya kele. . . Billy Graham tubaka kima mutindu mosi. Na yina, yandi zolaka katula kento ya yandi na ba-park, wapi mutindu kusala kindumba ya kati-kati ya babakala mpe bakento vwandaka landila, na ntuala ya bantu, na meso pwelele. Ntangu mu vwandaka kuna, mu me monaka ata fioti ve kima mosi ke pasula ntima ya muntu kulutula yina ke salamaka kuna na Angleterre; yinsi yina kuzwaka bweso, mpe, kilumbu mosi, twadisaka yinza na kusungika. Ya ke talisa kaka mutindu ya lenda kubwa.

³⁹ Kasi, beno me mona, yinki ke salaka yawu, nsangu yina kwendaka na ntangu yina, bantu ya Kingelesi ke meka na kukanga nsangu yina ya bubu yayi. Yina ke simba ve bubu yayi. Ya ke simba ve. Wapi mutindu. . .

⁴⁰ Yinki zolaka salama kana Moise zolaka kwisa, zolaka, kunata nsangu ya Noé, “Beto ke tunga nzaza mpe ke tepa na zulu ya Nil”? Ya zolaka ve kusala. Mpe to dyaka Nsangu ya Yesu zolaka sala ata fyoti ve na Moise. Mpe dyaka nsangu ya Wesley ke salaka na Luther; to ya Luther ya Wesley . . . nsangu, mutindu yayi mpe yankaka.

Mpe bubu yayi, beto, kusungika ya beto ya nsuka ya nene vwandaka Pentecote. Mpe bubu yayi beto ke na kukatuka na yawu. Mpe nsangu ya Pentecote ke vukana ve na Yayi, samu ya kele kilumbu yankaka. Ya kele nyonso Ndinga ya Nzambi, kasi ya kele yinzo. Mutindu makulu, maboko, ke mata, ya ke sala

Kento ya makwela samu na Enlevement. Beno me mona? Yina ke kanga nzila ve—ke kanga nzila ve na bantu yina tekilaka; bawu zingaka landila nsangu ya bawu. Bawu nyonso ke basika, yina vwandaka na kati ya Kento ya makwela.

Kaka mutindu luzingu ke luta na mwinga ya blé. Ya ke bika mbuma ya blé, yina kubwaka na ntoto, samu na kusala mbuma ya yinti yawu mosi.

⁴¹ Awa ntama mingi ve, mu vwandaka tanga buku mosi ya ba-Allemand mosi sonikaka, na masawula. Yandi tubaka, “Ya—ya bafanatiki nionso na yinza, William Branham ke na kutelemina bawu nionso.” Yandi tubaka, “Kasi, yandi kele kima mosi ve kasi. . . Yandi kele—yandi kele nganga-nkisi. Yandi ke salaka bima yayi.” Beno me mona, bakala yayi, na kuzabaka ve.

⁴² Mpe, na yina, muntu yango vwandaka sawula. Yandi vwandaka kwikila ve na Nzambi. Yandi tubaka, “Nzambi yina lendaka vwanda na bansungi ya mudidi, ke futika maboko ya Yandi na kivumu ya Yandi, mpe ke seka nkonga ya Baklisto; bayina vwandaka bamama, mpe bilandi ya Yandi Mosi, na kutala; bamama na bana ya fyoti mpe nyonso, mpe bikaka bankosi kudya bawu; mpe ata mbala mosi ve kupesa diboko.” Beno me mona kisika dibanza ya nsuni, kisika ndongosolo mpe nyonso, lenda ve kuzwa vision?

⁴³ Mbuma yango ya blé zolaka kubwa na ntoto. Kaka mutindu Yesu zolaka kubwa, samu na kuvumbuka dyaka, mutindu mosi dibuundu ya pantekote zolaka kubwa. Ya zolaka kota na ntoto, bansungi ya mpimpa yango. Blé nyonso yina. . . Mbuma nyonso yina ke kwendaka na ntoto, ya fwana bikana na ntangu yango ya mpimpa, samu na kubuta.

Kasi ya bandaka na kuyela na Martin Luther. Kwizaka na nzila ya Wesley. Kuna na Pentecote. Ntangu yayi na kati, samu na kubasika na mbuma. Mpe ntangu yayi ba-systeme ya ba-denomination yina me bikana na manima, ba kele bayinti, kaka yina. Ya fwana kuyokama, sysiteme ya denomination. Kasi mbuma ya kieleka ya blé yina basikaka na mosi na mosi ya bakusungika yango ke zanguka na kati ya Kento ya makwela. Yawu nyonso ke sala Kento ya makwela.

⁴⁴ Ntangu yayi beto ke mona ti, na Angleterre kuna, ba vwandaka mekula kulunsi, ntama mingi ve, nkonga ya bantu yina, bawu mingi. . . bana na bansuki ya yinda mpe nionso yina, mpe ke boka, yina ba bokilaka Yesu “tata ya fioti” mpe nyonso yankaka. Muntu ya mpamba yayi!

⁴⁵ Ntangu yayi beno ke tuba, “Yina kele na Londres, na Angleterre.”

Beno tala mbote yina vwandaka na zulunale sabala me luta, awa na Amerika. Docteur mosi ya théologie, yina basikaka na lukolo mosi ya mbote, tubaka ti kukomama na kulunsi vwandaka dyambu ya luvunu. Yandi tubaka ti, “Yesu mekaka

kaka na kusala Yandi mosi mutindu yina; ti Yandi nwaka mandragore.”

Mpe beto ke mona yawu na Genèse, kisika ba me zonzila yawu. Ya kele dititi mutindu marijuana to kima mosi. Ya kele na Esete kuna. Mpe kana beno kunwa yawu, ya ke tula beno na kulala. Mu banza. . . Mpe beno kele mutindu beno kele ya kufwa, bum-bum, nyonso, bilumbu zole to tatu na ntangu.

⁴⁶ Yandi tubaka, “Ntangu ba pesaka Yandi vinaigre mpe fiel, ya lendaka salama ti yina vwandaka mandragore na kisika yina. Mpe ntangu bawu salaka yawu, bawu pesaka Yandi yawu, mpe Yandi kwendaka na malembe mutindu Yandi kufwaka. Bawu tulaka Yandi na ntoni, mpe bawu tulaka Yandi kuna. Na manima ya bilumbu zole to tatu, kieleka, na kuvutukaka, kuna Yandi vwandaka ya kuvumbuka dyaka, vwandaka nyonso ya kulunga.” Yandi tubaka, “Yandi kwendaka kuna na Inde mpe kufwaka kisika mosi, lufwa ya mutindu nyonso, na kumekaka na kusala nsaka ya mbangu na nsambulu.”

Kisika ya ntete, kutonga yina, yinki kele dyambu na bantu? Beno me mona, ya kele kaka kilumbu yayi beto ke na kuzinga, bantu ke sekaka Nzambi, beno me mona, kilumbu samu na kulungisa profesu.

⁴⁷ Nzambi kabulaka Ndinga ya Yandi na konso nsungi, mpe mosi na mosi ya nsungi yango fwana monisa Yawu. Mpe Yandi tumaka bantu na ntwala samu na nsungi yina, samu na kulungisa Ndinga yina. Konso ntangu Yandi kabulaka Ndinga ya Yandi, Yandi soolaka na ntwala muntu mosi samu na yawu. Ntangu Yandi soolaka na ntwala ntangu ya Moise, Yandi soolaka Moise samu na yawu. Ntangu Yandi soolaka na ntwala ntangu samu na Mwana ya Nzambi na kubutuka, Yandi soolaka na ntwala Yandi na yawu. Konso nsungi, Yandi me soolaka muntu ya Yandi, yina ba soolaka na ntwala, mutindu Biblia ke tuba. Kima mosi ve. . .

⁴⁸ Kana Nzambi kele ya seko, ya Ngolo nyonso, ya kulutula ngolo nyonso, yina kele bisika nyonso, yina zaba nyonso, na yina, Yandi zabaka bima nyonso na mbandukulu. Na yawu, Yandi zabaka. Ya kele ve na kima na lweka. Ya kele kaka beto yina ke banzaka ti ya kele. Ya kele nyonso kima mbangu. Beno tala na manima na Ndinga ya Yandi mpe beno mona yina Yandi ke na kusala, na yina beto ke kuzwa lubakusu.

⁴⁹ Ntangu yayi, beno banza kaka. Kisika ya ntete, kana longi yina zolaka banza, ntangu bawu tulaka vinu yina mpe ndudi na yinwa ya Yandi, Yandi losilaka yawu mate. Yandi bakaka yawu ve, na kisika ya ntete. Beno me mona? Kaka baseki ke telama! Kima yankaka, wapi mutindu Yesu yayi ya Nazareth, wapi mutindu luzingu ya Yandi vwandaka lunga konso profesu ya Ngwisani ya Ntama? Wapi mutindu ya zolaka vwanda? Ya zolaka vwanda ve kukondwa ba soola yawu na Nzambi. Luzingu

ya Yandi ke lunga konso profesu ya Ngwisani ya Ntama. Kima yankaka, kana bilandi yina salaka Yandi mutindu yina, samu na yinki mosi na mosi ya bawu kufwaka na bambangi? Mpe ntumwa Pierre tubaka, “Beno balula yintu ya munu na zulu. Mu kele ve ya kulunga na kufwa mutindu Yandi.” Wapi mutindu bawu bakaka André mpe balulaka yandi na lweka na kulunsi. Bawu, bawu nionso, kangaka kimbangi ya bawu na menga ya bawu mosi. Bawu kwikilaka Yandi mpe zolaka Yandi, mpe pesaka baluzingu ya bawu samu na Yandi. Kana Yandi vwandaka muntu ya luvunu, wapi mutindu bawu zolaka sala yawu? Beno me mona? Kisalu ya kimpeve, bantu ke bakula yawu ve.

⁵⁰ Awa vwandaka na muntu mosi ya nene awa, ntama mingi ve, rabbi mosi ya nene yina sonikaka ti, “Moise, na ntangu bawu vwandaka luta na Mubu ya Mbwaki,” yandi tubaka, “ya vwandaka masa ve. Bamasa vwandaka ata fioti ve na kibaka.” Yandi tubaka, “Yinki ya vwandaka, kuna na nsuka ya Mubu ya Kufwa, ya vwandaka na kinkuku ya madiadia. Mpe bawu lutaka na kati ya madiadia ya masa, madiadia ya masa. Masa kele ve kuna na kati. Kaka kinkuku ya madiadia, mubu ya—ya madiadia yina bawu lutaka kuna.” Mpe banganga-Nzambi mingi ke kwikilaka yawu, bawu, mpe ke ndimaka yawu.

⁵¹ Awa ntama mingi ve, ntangu astronoute yayi ya ntete kwendaka kuna, yandi vutukaka, mpe yandi monaka kima mosi ve ya Nzambi. Yina mpe me vwalangisa milongi. Bawu banzaka ti Nzambi vwandaka zinga kisika mosi kuna na nsi, na bankama zole na makumi tanu ya bakilometele na zulu.

⁵² Oh, la la, wapi mutindu ndongosolo mpe ndwenga ya yinza yayi me soba dibuundu na kinkuku ya matiti ya yimbi! . . . Malongi ya yawu mpe sysiteme ya lukolo, science mpe civilisation, kele ya dyabulu. Ya kele civilisation ya dyabulu. Biblia me tuba mutindu yina.

Mpe Civilisation ya beto yina ke kwisa ke kuzwa kima mosi ve ya kusala na civilisation yayi, ata fioti. Ya kele ve kima mosi ya yawu, ata fyoti. Ya ke vwanda na Civilisation ya luswaswanu, na civilisation yayi mpe yinza yayi ya science beto ke na yawu. Kulutila beto ke kuma bantu ya science, kulutila beto ke kwenda ntama, beto ke belama na lufwa, na mitambu ya lufwa, mpe nyonso. Na Civilisation yina ya malu-malu, ya ke vwanda na lufwa ve, kimbevo ve, kiadi, to mpasi ve. Beno me mona? Ya ke vwanda na muntu mosi ve na kati Kuna. Na yina civilisation yayi fwana kubeba, samu ya kele ya diabulu.

⁵³ Beto ke tala, ti na Genèse 4, ti bantu ya Caïn kubandaka civilisation, kutunga bayinzo ya mbanza mpe bambanza, mpe nyonso yina, mpe bisadilu ya musiki, mpe kukuma na science. Mpe bantu kwendaka ntama mingi na Nzambi, kasi misambidi. Kasi ntangu bantu ya Seth kwizaka, bawu bandaka na kwiza, bokilaka na Nkumbu ya Mfumu.

Ah, beno ke zonzila kima mosi ya mayele mingi!

⁵⁴ Mu kele awa ve samu na kutalisa muntu mpasi kele bansatu ya muntu nionso, kutuba kima mosi samu na dibuundu. Mpe kana beno kele awa, mpe beno vwanda ya dibuundu yayi, mu ke tuba yayi ve samu na kuniongisa beno; samu ti kaka bantu mingi ya mbote na kati kuna, mutindu ya kele na mabuundu yankaka. Kasi mu vwandaka tanga na Shreveport sabala me luta, kisika dibuundu ya Katolika salaka nsamunu mosi.

Mpe beto ke mona kisika bawu nyonso ke na kuvukanaka ntangu yayi na kimvuka ya nene ya oeucuménisme, mpe nyonso yina, kaka kieleka na kulungisaka yina Biblia tubaka ti bawu ke sala. Kaka kieleka.

⁵⁵ Ntangu yayi beto ke mona ti bawu tubaka, “Kasi, Biblia . . .” Ndambu ya ba-Protestant ke zola kukangama na Biblia yina. “Kasi,” yandi tubaka, “Biblia vwandaka kima mosi ve kasi buku, disolo ya dibuundu, mpe bawu vwandaka ve na yawu na mikanda tii pene ya bamvula bankama tanu me luta. Ya ke vwandaka ntangu nionso dibuundu.” Yandi tubaka, “Ya vwandaka dibuundu, Biblia ve, mpe Biblia kele kaka disolo ya yina dibuundu salaka.” Wapi luvunu ya luvunu ya mayele ya kele! Mbote, beto me kuzwa Biblia bamvula mafunda tatu. Ngwisani ya Ntama sonamaka na kati ya Masonuku, bankama mpe bankama ya bamvula ntete nkwezulu ya Klisto. Kaka kima ya mayele ya dyabulu!

⁵⁶ Mpe beto ke mona na kilumbu yayi, ntangu kuseka ya nene yayi mpe kuseka ya Biblia, mpe ke meka na kupusa Yawu na ngaanda, Nzambi fwana kufundisa dibuundu na nzila ya kima mosi. Yandi lenda vwanda ve kaka . . .

Bawu lendaka kulumuka ve na nzila yayi mpe kukanga munu, mpe kutuba ti mu ke sala bakilometele makumi yiya na tanu na mupepe na kizunga yina beno fwana sala makumi tatu, kaka ti ya kele na kima kuna samu na kutuba na munu ti mu kele kaka na muswa ya kukwenda bakilometele makumi tatu. Ya fwana vwanda kuna.

Mpe Nzambi ke sambisa dibuundu, ke sambisa bantu, kilumbu mosi. Beto zaba yawu. Ya kele na Lufundusu yina ke na kwiza. Na yawu kana Yandi ke sambisa yawu na nzila ya dibuundu ya Katolika, yina dibuundu ya Katolika? Kana Yandi ke sambisa yawu na nzila ya ba-Methodiste, ba-Baptiste me zimbana. Kana Yandi ke sambisa yawu na nzila ya ba-Unitaire, ba-Binitaire me zimbana. Beno me mona? Yinki Yandi ke sambisa na nzila ya yawu? Yandi tubaka ti Yandi ke sambisa yawu na nzila ya Klisto, mpe Klisto kele Ndinga. Na yawu ya kele Ndinga ya Nzambi, ti Nzambi ke fundisa. “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto. Mutindu mosi mazono, bubu yayi,

mpe kukonda nsuka.” Beno me mona? Na yawu, Yandi ke fundisa yawu na nzila ya Ndinga ya Yandi.

⁵⁷ Mpe ntangu yayi beto ke mona ti na kilumbu yayi, ntangu ba ke meka na kutula Biblia na ngaanda (“Beno ndima dibuundu!” Biblia: beno zola Yawu ve. “Dibuundu!”) na yawu bawu lenda sala kaka mutindu nyonso ya credo to kima yankaka, mpe kutambula na nzila ya yawu.

⁵⁸ Mbote, na yina mu vwandaka zonza nkokila yankaka yina na Shreveport. Na kati ya kominyo, ntangu ba ke kufwa mwana-dimeme yina ya munkayulu, ya vwandaka ve na “levire na kati ya bawu, na kati ya bilumbu sambwadi nionso,” ata levire ve, ata dimpa ya levire ve. Nyonso zolaka vwanda kukondwa levire. Yina vwandaka monikisa bansungi sambwadi ya dibuundu yina beto ke kota na buku awa, mpe ya kele ve na levire. Yinki? Ya kele kima mosi yina me vukana na Yawu. Mpe beto ke vukisa ba-credo mpe ba denomination, bima nionso yankaka, na Ndinga, mpe beto ke meka kaka na kubokila yawu Ndinga. “Ata levire ve, ke vwanda kilumbu ya muvimba sambwadi.”

⁵⁹ Mpe ata yina beno ke kudya bubu yayi, beno meka ve na kubumba yawu samu na mbasi. “Yoka yawu na tiya, ntete nsemo ya kilumbu kukwiza,” samu ti ya kele na Nsangu ya malu-malu yina ke na kwiza, mpe kima ya malu-malu. Beno me mona, beno meka na kukanga yawu, kasi yina vwandaka nkadulu ya dibuundu. Reveil ke basika, mpe kima ya ntete beno zaba, na kati ya pene ya bamvula tatu, bawu ke banda organisation na zulu ya yawu. Dénomination ke banda, organisation.

Kasi beno me bakula? Yayi me kombola bamvula makumi zole ntangu yayi, mpe ya kele ve na organisation. Mpe ya ke vwanda ata fioti ve. Yayi kele nsuka. Blé me vutuka diaka na blé. Blé me vutuka na mbuma ya yawu. Mpusu me katuka na yawu. Mpe blé fwana vwanda na Ntwala ya Mwana, samu na kuyela.

⁶⁰ Ya kele ve kima ya ngitukulu, ti, ntama mingi ve, na Simu ya Esete, na ndombi ya nene? Ba lendaka ve kubakula yawu. Texas ya ndombe, sabala me luta. Ba lendaka ve kubakula yawu. Beno ke bakula ve ti ya kele kidimbu? Beno zaba ve ti bayinsi ke na kupanzana? Israel kele na yinsi ya yandi. Mpe bidimbu yayi ke na kulakisa ti beto kele na nsuka. Na ntangu mosi ya ke ndombe, beno zaba ve ti ya kele kidimbu ti profete me tuba? Yinga. “Kasi ya ke vwanda na Nsemo na ntangu ya nkokila,” ti ya ke vwanda na Nsemo ke kwiza na ntangu ya nkokila, ntangu nionso kumaka mudidi mpe bima ke tambula mutindu ya kele bubu yayi.

⁶¹ Beno tala kaka mutindu ya vwandaka ndombe. Pape kwizaka kaka awa.

Beno bambuka moyo, kuna na tabernacle, ntangu bawu. . . Beno kele na ba-bande. Mu banza, beno nionso ke baka yawu. Mutindu ti Mfumu lakisaka kuna kilumbu yina, na tabernacle, kieleka kisika bansungi yango ya dibuundu ke vwanda mpe

mutindu bawu ke vwanda! Mu yemaka yawu na tableau kuna na zulu, bansungi ya dibuundu yina beno ke mona awa ya kuyema na buku mosi. Mpe kana Mpeve-Santu yina kulumukaka ve na Dikunzi ya nene ya Tiya, mpe vutukaka kuna na kibaka yina mpe yemaka yawu, Yandi mosi, na yina bantu bankama tatu to yiya ya kuvwanda, na kutalaka Yawu!

Mpe kaka mutindu pape bandaka awa, ngonda na mutindu mosi ndombe. Mpe bawu bakaka bafoto ya bawu mutindu mosi yina ba yemaka yawu kuna na estrade. Ntangu yayi yandi me sala nzietelo ya yandi awa na zulu ya kumi na tatu, yandi me tambula na bimatini kumi na tatu, yandi me sala kominyo na kumi na tatu, na yinsi yina kele lutangu ya kumi na tatu, mpe bisika ya ndombe ke na kwiza bisika nyonso. Beno ke mona ve kisika beto kele? Beto me kuma na ntangu ya nsuka.

⁶² “Bantu ke sekaka ke vumbuka na lufwa na kilumbu ya nsuka, na kutubaka, ‘Ya kele ve na luswaswanu na ntangu yina ya vwandaka, kulutila ntangu batata ya beto kufwaka.’”

Kasi ntangu beno ke mona bima yayi ke salama, beno telemisa yintu ya beno, beno kubama. Kima mosi lendaka salama na konso ntangu yina, Klisto kwisaka samu na Dibuundu ya Yandi.

⁶³ Ntangu yayi, bawu ke kwikilaka yawu ve, samu ti ya kele . . . ya kele . . . Bawu, bawu fwa- . . . Bawu zaba ve ti bawu kele bayina ke na kulungisa Masonuku. Bantu ke bakula yawu ve, ke sala bima yayi mpe ke tuba bima yayi, bawu ke na kulungisa Masonuku.

Wapi mutindu mwa Caipe, nganga-Nzambi ya mbuta, mpe banganga-Nzambi yina nionso na kilumbu yina, bayina sekaka mpe sawulaka Yandi, bawu zabaka yawu ve, Nzambi yina bawu vwandaka yimbila, “Nzambi ya Munu, samu na yinki Nge me yambula Munu?” Psaumes 22, “Maboko ya munu mpe makulu ya Munu ba tobolaka.” Na kuyimbilaka yina na tempelo, mpe Yandi vwanda kufwa kuna na zulu ya kulunsi. Bawu zabaka ve ti bawu vwandaka sala yawu. Mpe Yesu sambilaka, “Tata, lemvočila bawu. Bawu zaba ve yina bawu ke na kusalaka.” Samu ti, kieleka ba zabisaka bawu na ntwala, na nzila ya Masonuku, samu na kuvwanda mpofo.

⁶⁴ Beno zaba ti dibuundu ya ba-Protestant mpe dibuundu ya Katolika yina ba zabisaka na ntwala, na bilumbu ya nsuka, samu na kuvwanda mpofo, kima mutindu mosi, na Masonuku, na Klisto na ngaanda, na kumekaka na kukota? “Samu ti nge ke tuba, ‘Mu kele mvwama, mpe kele na nsatu ya kima mosi ve,’ nge zaba ve ti nge kele muntu ya mawa, mputu, ya mawa, kinkonga, mpe mpofo, mpe nge zaba yawu ve,” Apocalypse 3. Beno bawu yayi, kuvutuka dyaka na kimpofu, ke yenga-yenga na zulu ya bima ya Nzambi, mutindu kana (bawu) Ya zola kutuba kima

ve na bawu, kuseka mpe kusawula Yawu. Ya kele yina Biblia ke tuba.

⁶⁵ Kasi, na Dibuundu, Kento ya makwela, Enlevement kele luzayikisu ya Yandi. Ya me monisama na Yandi. Ti, luzayikisu, Kento ya makwela ya kieleka ya Klisto ke vingila luzayikisu yina ya Enlevement.

⁶⁶ Ntangu yayi, ya kele luzayikisu, samu ti luzayikisu kele lukwikilu. Beno lenda ve kuzwa luzayikisu kukondwa ti ya vwanda lukwikilu. Lukwikilu kele luzayikisu, samu ti ya kele kima yina me monana na beno. Lukwikilu kele luzayikisu. Lukwikilu kele kima yina me monisama na beno, mutindu ya wandaka na Abraham, yina lendaka bokila kima mosi ya kuswaswana na yina kumonisamaka na yandi, mutindu ti ya wandaka ve mutindu yina. Ntangu yayi, lukwikilu, ya kele yina lukwikilu kele, ya kele luzayikisu ya Nzambi. Dibuundu kele ya kutunga na zulu ya luzayikisu, Nzutu ya muvimba.

⁶⁷ Awa basabala fyoti me luta, mu vwanda zonga na mulongi mosi ya mbote ya Baptiste. Yandi me kwiza kusolula na munu. Yandi tubaka, “Mu zola nge mutindu muntu, kasi,” yandi tubaka, “nge nyonso kele na poto-poto.”

Mu tubaka, “Na yina, mu ke sambila ti nge sadisa munu na kuvwanda ya kusungama,” (yandi tubaka. . .) “na Masonuku.”

Yandi tubaka, “Beto ke lenda ata fioti ve, Mpangi Branham, samu na kunata bima kintwadi tii beto ke kuzwa Ndinga nyonso na zulu ya Ndinga, na zulu ya Ndinga, kieleka na Grec, mpe nyonso yina.”

⁶⁸ Mu tubaka, “Oh, tata, nge zaba ya kulutila yina.” Mu tubaka, “Ata mpe na Lukutakanu ya Nicée, ntama mingi ve mutindu yayi, bankama tatu ya bamvula kubanda lufwa ya Klisto, ba wandaka swana na kati ya bawu samu na kuzaba wapi lukolo ya Greki wandaka ya kusungama. Beno lenda zaba. Ya kele luzayikisu, kima ya muvimba. Ya kele ku- . . .”

Yandi tubaka, “Mu lenda ve kundima luzayikisu.”

Mu tubaka, “Na yina wapi mutindu beno lenda ndima Klisto?”

Yandi tubaka, “Kasi, Biblia me tuba, ‘Yandi yina ke kwikila kele. . . na Yesu Klisto, kele na Luzingu ya kukonda nsuka.’”

⁶⁹ Mu tubaka, “Ya kele kieleka. Ya ke tuba mpe ti muntu ve lenda bokila Yesu Klisto kaka na luzayikisu ya Mpeve-Santu yina monisaka yawu na yandi.” Beno me mona? Beno bawu yayi, kaka na manima na nziunga dyaka, ke kubwa kaka na luzayikisu. Ya fwana kumonisama, na kati ya Biblia.

⁷⁰ Caïn mpe Abel wandaka ve na Biblia samu na kutanga, kasi ya wandaka ya kumonisama na Abel, na nzila ya lukwikilu, yina kele luzayikisu. Abel pesaka na Nzambi munkayulu ya

kulutila kitoko na yina ya Cain. Na yina, Nzambi pesaka kimbangi ti yandi vwandaka ya kusungama.

Ntangu ba yufulaka Yesu awa, Matthieu 16:17 mpe 18. Beto kele ve na ntangu ya kutanga yawu, kasi kana beno zola kusonika yawu. Yandi tubaka, “Nani bantu ke tuba ti Munu Mwana ya muntu kele?”

“Mosi ya bawu tubaka ti Nge kele ‘Moise, Elie, to nyonso yankaka yina.’”

Yandi tubaka, “Kasi Nani beno ke tuba ti mu kele?”

⁷¹ Yandi tubaka, “Nge kele Klisto, Mwana ya Nzambi ya moyo.”

⁷² Yandi tubaka, “Kyese na nge, Simon, mwana ya Jonas, samu ti nsuni mpe menga ve me monikisa yayi na nge. Tata ya Munu yina kele na Mazulu me monikisa Yayi na nge. Na zulu ya ditadi yayi,” luzayikisu ya kimpeve ya Nani Nzambi kele, Nani Yesu kele. Mpe Yandi kele luzayikisu ya Nzambi, Nzambi me kuma na nsuni mpe me monisama na yinza.

“Yandi vwandaka na yinza. Nzambi vwandaka na kati ya Klisto, na kuvutulaka ngwisani kati-kati ya yinza na Yandi mosi, na kumonisaka yina Nzambi vwandaka, na nzutu ya nsuni.”

“Nge kele Klisto, Yina ba me pakula, Mwana ya Nzambi.”

⁷³ Yandi tubaka, “Nsuni mpe menga ve me monikisa yayi na nge, kasi Tata ya Munu yina kele na Mazulu me monikisa yayi na nge. Na zulu ya ditadi yayi Mu ke tunga Dibuundu ya Munu, luzayikisu ya Ndinga na nsungi ya Yawu. Mu ke tunga Dibuundu ya Munu, mpe bankotolo ya difelo lenda nunga Yawu ve.”

⁷⁴ Buku ya Apocalypse kele Buku ya nsuka ya Biblia. Ya me niemama na zulu ya bantu ya kukondwa lukwikilu. Na kati kuna, Biblia ke tuba, na kapu ya 22, “Muntu nyonso yina ke katula Ndinga mosi na Yawu, to ke bwela ndinga mosi na Yawu, Mu ke katula ndambu ya yandi na Buku ya Luzingu.” Beto me bakula yawu, na yina, ba pesaka yawu nionso samu na bakwikidi. Mpe Yawu ke zibula Buku ya Apocalypse mpe ke monisa Nani Nsoniki ya Buku yayi nionso kele. “Yandi ke tala na zulu mutindu Alpha mpe Omega,” kubanda Genèse tii Apocalypse, Yesu Klisto kaka mutindu mosi, kaka mbala mosi na kati ya yawu. Mpe ke monisa mansweki ya Yandi ya muvimba ya Yandi mosi, mpe manaka ya Yandi samu na bansungi ya dibuundu ya Yandi yina ke na kwiza, mpe yina vwandaka ya kutula kidimbu na kati kuna na nzila ya Bidimbu Sambwadi.

⁷⁵ Ntangu yayi, ba sonikaka Buku, kasi na manima, beno bambuka moyo, Ya vwandaka ya kukanga na Bidimbu Sambwadi. Mpe Bidimbu Sambwadi yayi zolaka zibuka ve (Apocalypse 10) tii makelele ya wanzio ya ntoto ya nsuka na zulu ya ntoto, Apocalypse 10:7. Beno me mona? “Mpe na bilumbu ya muningu ya Nsangu ya wanzio ya nsuka, wanzio ya sambwadi,

mansweki ya Nzambi ke manisa na nsungi yina.” Ti, mpe ya kele nsungi yina beto ke na kuzinga.

⁷⁶ Beto nyonso zaba ti beto ke na kuzinga na Nsungi ya Laodicée. Ya ke vwanda ata mbala mosi ve na nsungi yankaka na yawu. Ya lenda vwanda ve. Na yawu, beto ke na kuzinga na Nsungi ya Laodicée. Mpe Bidimbu Sambwadi yayi yina me kanga Buku yina, kele mansweki samu na bantu, ke zibuka na kilumbu yina. Ya kele yina Yandi silaka. Ntangu yayi, ya ke vwanda ve kima mosi na ngaanda ya Ndinga, samu ti beno lenda bwela ve na Ndinga to kukatula na Ndinga. Ya fwana vwanda kaka ntangu nyonso Ndinga. Kasi luzayikisu kele samu na kumonisa Kieleka ya Yawu, yina Yawu kele, samu na kusala Yawu kulunga na Masonuku nyonso yankaka. Mpe kuna Nzambi ke siamisa ti ya kele Kieleka. Beno me mona?

⁷⁷ Nzambi kele na nsatu ya mutendudi mosi ve. Yandi kele mutendudi na Yandi Mosi. Yandi ke sala ntendulu ya Yandi Mosi na kulungisaka bima yina Yandi tubaka ke salama. Mutindu, na mbandukulu, Yandi tubaka, “Ti nsemo kuvwanda,” mpe kuna nsemo vwandaka. Yina ke na nsatu ya ntendulu mosi ve. Yawu siamisamaka.

⁷⁸ Ntangu yayi, Yandi silaka bima mosi na kilumbu yayi ya nsuka, na Masonuku. Samu na yinki, yawu vwandaka kuna.

Ya kele mutindu Yesu vwandaka Mwana ya Nzambi. Yandi silaka na kutinda Yandi. Ntangu Yandi vwandaka na bilumbu ya Yandi awa na zulu ya ntoto, mpe bantu zolaka kwikila Yandi ve, Yandi tubaka, “Benoni longuka Masonuku, samu na Yawu beno ke banza ti beno kele na Luzingu ya Kukonda nsuka, mpe Yawu kele Yawu yina ke pesa kimbangi ya Munu. Kana Mu ke sala ve bisalu ya Tata ya Munu, na yina beno kwikila Munu ve. Kasi kana beno lenda kwikila Munu ve, beno kwikila bisalu yina Mu ke sala, samu ti ya ke pesa kimbangi na Nani Mu kele.”

⁷⁹ Mbote, na yina, na nsungi ya Wesley, bisalu yina yandi salaka pesaka kimbangi nani yandi vwandaka.

Na nsungi ya Luther, na kusungika, na yina, kieleka, ya pesaka kimbangi nani yandi vwandaka.

⁸⁰ Na bilumbu ya ba-Pentecotiste, kuvutuka ya makabu, kuvutuka ya makabu, na kuzonzaka na bandinga mpe na kubasisaka bampeve ya yimbi, mpe makabu, mbote, ya pesaka kimbangi. Ya vwandaka ve na nsaka samu na yawu. Bantu tubaka, ntangu ya telamaka ntete. . . Mu tangaka babuku na disolo ya Pantekote. Bawu tubaka, “Ya lenda vwanda ntama mingi ve. Ya ke kuzika na tiya.” Ya ke na kupela dyaka. Samu na yinki? Ya kele samu ti ata mbala mosi ve ti beno ke tula yawu na ngaanda. Nzambi tubaka ti ya ke vwanda kuna. Ya kele kitini yina ya Ndinga, mpe dyaka ve beno lenda tula yawu.

Mpe kuna ntangu ba ke bokila Kento ya makwela, wapi mutindu beno ke tula yawu na ngaanda? Ya kele luzayikisu ya

kumonisama ya Ndinga kukuma kieleka. Mpe beto ke na kuzinga na kilumbu yina; lukumu na Nzambi; luzayikisu ya mansweki ya Yandi mosi.

⁸¹ Ntangu yayi, Enlevement kele kaka . . . Enlevement yayi yina beto ke na kuzonzila, kele kaka samu na Kento ya makwela. Beno bambuka moyo, Biblia ke tuba, “Mpe bayankaka ya kufwa ke zinga ve bamvula funda mosi.” Enlevement ya nene yayi! Kana ya kele ve na Enlevement, bankundi, wapi kisika beto kele? Yinki beto ke sala? Na wapi nsungi beto ke na kuzinga? Na wapi nsilulu beto kele na yawu? Ya ke vwanda na Enlevement. Biblia me tuba ti ya ke vwanda. Mpe ya ke vwanda kaka samu na bantu ya Kusolama, Mama ya Kusolama, Kento ya makwela na kilumbu yayi, yina ba me basisa, Dibuundu.

⁸² Mpova ya ku- . . . mpova ya kieleka, *dibuundu*, zola kutuba “yina ba me bokila na kubasika.” Mutindu Moise bokilaka yinsi mosi na yinsi mosi, Mpeve-Santu ke bokila Kento ya makwela na nganda ya yinzo-Nzambi; Dibuundu na ngaanda ya dibuundu; bamambele, na denomination nyonso, na kusalaka Kento ya makwela, yinti ya Kento ya makwela. Ya kele na—na bande, *Yinti Ya Kento Ya Makwela*. Kento ya makwela ke basika, ke bokila, mpe ya kele yandi yina . . . yinti ya Kento ya makwela kele, Kento ya makwela, na kisika, kele yandi yina ke vwanda na Enlevement; ti, kaka, kima ve kasi Kento ya makwela, bantu yina ba soolaka ntete na nzila ya Nzambi katuka mbandukulu, ba-gene ya kimpeve ya Tata.

Beno bika mu telama fioti awa. Mpe mu ke vwandaka na kidi-kidi, mu ke banza ti mu ke kanga beno, mu ke kanga beno ntangu ya yinda.

⁸³ Kasi, beno tala mbote, beno tala, mosi na mosi ya beno bantu. Beno zaba, bamvula ntete beno butuka, beno vwandaka na kati ya tata ya beno mutindu gene? Ya kele kieleka. Nkuna, nkuna, vwandaka na kati ya tata ya beno; yina me katuka na sexe ya bakala, kento ve. Beno me mona? Kento ke pesa diki, ntoto ya kuyuma. Kasi nkuna ke katuka na ki- . . . Ntangu yayi, beno tuba, na tata ya munu . . .

⁸⁴ To, mwana ya munu ya bakala ya kuvwanda awa, ntangu mu vwandaka na bamvula kumi na sambanu, mwana ya munu ya bakala vwandaka na kati ya munu. Mu zabaka yandi ve, kasi yandi vwandaka kuna. Ntangu yayi, na nzila ya kilanga ya lubutu, na nzila ya makwela ya santu, yandi me kuma na kifwani ya munu. Mu zaba yandi. Mu lenda wisana na yandi. Mpe yandi me kwiza kaka na ntangu yina ya kele ntangu ya kulunga.

⁸⁵ Ntangu yayi, mutindu mosi beno vwandaka, kana beno kele na Luzingu ya Kukonda nsuka, beno vwandaka . . . na Nzambi ntete yinza kuvwanda. Beno kele kitini, mwana ya Nzambi, kisalulu ya Nzambi. Yandi zabaka ti nsungi ya kieleka beno ke kwisa. Yandi zabaka beno na mantwala samu na nsungi yina,

samu na kubaka kisika yina, mpe muntu yankaka ve lendaka baka yawu; kipe ve lutangu ya bakumekula mpe nyonso. Beno fwana vwanda kuna, samu ti Yandi zabaka ti beno ke vwanda kuna. Ntangu yayi beno me talana. Ntangu yayi beno lenda kubundana na Yandi, mpe ya kele yina Yandi zola. Yandi ke vingila kubundana, samu ba sambila yandi. Kasi kana luzingu ya beno ve . . . ntangu nionso vwandaka mutindu kinama na kati ya Nzambi, beno kele kaka Buklisto ya dikanda. Beno me mona? Ya ke vwanda na mafuku mpe byazi ya bawu, ba ke vwanda kaka ya Buklisto.

⁸⁶ Nsamununu mosi yina mu salaka ntama mingi ve. Mu vwandaka tala mbote Mpangi Demos Shakarian kuna, ntangu ba vwandaka vukisa bibulu, mpe mu talaka mbote ba-tube ya kumeka, mpe nionso yina, mutindu ti ba bakaka yawu na ba-vétérinaire, mpe mu vwandaka tala bima yayi.

⁸⁷ Na éjaculation ya kibulu ya bakala, ya kele na mafuku ya bankuna ke basikaka na bakala na ntangu nionso. Mpe ndambu ya mafuku ya meki ke katukaka na kento na—na ntangu mosi. Kasi beno zaba, na mwa bankuna yina nyonso vwandaka tambula bisika nyonso, mafuku ya bawu, ya kele kaka na mosi ya bawu yina ba solaka na luzingu, mpe ya kele kaka na diki mosi yina ke butaka? Mpe mwa nkuna yango ke komvula kaka na zulu ya mosi na mosi ya bawu mwa bankuna yina yankaka, kaka na zulu ya konso nkuna ya fyoti ke talana kaka mutindu yandi, mpe ke kwiza na zulu ya *yawu* mpe ke kwiza *awa*, samu na kuzwa diki yina ke butaka mpe yandi ke kota na kati yawu. Mpe na manima nionso yankaka na kati ya bawu ke kufwa. Na yina, beno ke zonzila na mbutukulu ya bumwense, oh, ya kele ve ndambu ya mansweki mutindu mbutukulu ya nzutu, mutindu ba kubikaka yawu na ntwala, ba zabaka yawu na ntwala na Nzambi!

⁸⁸ Ntangu yayi, na mbandukulu, ntama mingi ve, bamvula mingi me luta ntete ti ntangu mosi kubanda, beno, kana beno kele Muklisto yina me butuka mbala zole, na nkokila yayi, beno vwandaka na kati ya Nzambi kuna, Tata ya beno. Ya kele samu na yina, ntangu beno ke kota na luzingu yayi awa mpe ke zonza Buklisto, mbote, nyonso ke tambula mbote ve, beno vwanda kumiyufula samu na yinki *yayi* kele, mpe nyonso *yayi*. Yawu, beno vwanda kumiyufula na yawu. Kasi, kilumbu mosi, Kima mosi bulaka beno. Yinki Yawu vwandaka? Luzingu yina vwandaka kuna na kati, katuka mbandukulu. Mpe kana ya . . .

⁸⁹ Mutindu mwa disolo ya munu na zulu ya ngononi, na kutalaka yawu, mama ya yandi na kumonaka ngononi. Beno me kuwaka munu kulonga na zulu ya yawu, mutindu mwa ngononi yina me butuka na yisi ya nsusu ya kento. Kasi yandi, nkadulu ya yandi ya kumeka na kudisa bansusu yina—yina, mwa ngononi yina lendaka ve na kifundu yina, samu ti yandi vwandaka nsusu ve, na kubanda. Kasi, yandi vwandaka na yinzo ya bansusu na bansusu, mpe kulanda nsusu. Kasi yandi ke kwanza yandi

mpe nionso yina, mpe mwa ngononi yina lendaka ve kukanga ntima na yawu. Kasi ntangu nyonso yandi vwandaka yimba mpe nyonso, bana nyonso ya bansusu vwandaka kwenda, samu ti yandi kwenda mpe. Kasi kilumbu mosi . . .

⁹⁰ Mama ya yandi zabaka ti yandi tulaka meki zole, ata mosi ve. Ya zolaka vwanda na mosi yankaka, kisika mosi kuna. Yandi kwendaka kusosa yawu, yandi bandaka na kupumbuka mpe kubaluka. Na nsuka yandi kwisaka na lupangu ya bansusu, mpe yandi monaka bébé ya yandi, mpe yandi bokaka na yandi. Ya vwanaka ndinga, ti, yandi bakulaka ti ya kele kima yina me lunga. Yawu yina yandi vwanaka sosa, beno me mona, mpe yandi bakulaka ti yandi vwanaka nsusu ve. Yandi vwanaka ngononi.

Mpe ya kele mutindu, Muklisto nyonso yina me butuka mbala zole, ntangu beno ke kwiza. Mu ke kipe ve badenomination yikwa beno me kuma, bankumbu yikwa, beno ke tula nkumbu ya beno na babuku mpe nionso yina, ntangu Ndinga yina ya kieleka ya Nzambi me siamisama mpe me kuma kieleka na ntuala ya beno mutindu yina, beno ke bakula ti beno kele ngononi, kaka kuna. Samu, kimalu yayi nionso ya nsusu ya kento, “Beni kota na *yayi* mpe beno kota na *yayi*, mpe beno kwenda lweka *yayi* mpe nzila *yina*,” ya kele buzoba. Ya kele Ndinga ya kieleka, yina ke bwela Ndinga na Ndinga.

⁹¹ Ntangu nkuna ke kota na kivumu ya—ya kento, ya ke baka ve . . . Beno, beno me kuma ve germe ya muntu na tata ya beno, mpe kuna kima yina ke landa beno ke kuma germe kubanda na yimbwa, mpe kima yina ke landa na niawu, kima yina ke landa na nsusu. Ya vwanaka germe nyonso ya kimuntu.

Mpe Nzutu ya Yesu Klisto, Kento ya makwela, ke vwanda kitini ya Nzutu ya Yandi. Yina ke . . . Yandi vwanaka Ndinga, mpe Kento ya makwela fwana vwanda Ndinga; Ndinga ba me bwela na Ndinga, kubwela na Ndinga. Kunungisama ya Luther, kusantisama ya Wesley, mbotika ya ba-Pentecotiste ya Mpeve-Santu, kuvutuka ya makabu, mpe nyonso yankaka ya Yawu, ke kwenda na Yawu. Beno me mona? Ya fwana vwanda Ndinga na zulu ya Ndinga, germe na zulu ya germe, Luzingu na zulu ya Luzingu, samu na kubasisa ntela ya kifuluka ya Kento ya makwela ya Mfumu Yesu Klisto. Ntangu yayi, beno ke bambuka moyo ti beno vwanaka kinama.

⁹² Mpe ntangu yayi, kima ya yawu kele, na manima beto me mona bima yayi, ti Klisto ke na kwiza samu na Kento ya Yandi ya makwela, ntangu yayi wapi mutindu beto ke kota na kati ya Kento yangu ya makwela? Ya kele kyuvu.

Mingi ke tuba, “Beni kota na dibuundu ya beto.” Mosi ya bawu zola mutindu mosi ya mbotika. Mosi zola kusala *yayi* to *yina*. Mosi tubaka, “Beni fwana zonza na bandinga, to beno kele na Yawu ve.” Yankaka yina tubaka, “Beni fwana ve kuzonza na

bandinga.” Yandi yayi ke tuba, “Beno fwana bina na kimpeve.” *Yayi* ke tuba, “Beno fwana boka.” *Yayi*, “Beno kuzwa sensation.” Ya kele nyonso mbote, mpe kuna, dyaka, ya kele nyonso yimbi.

Wapi mutindu bakala yina kele. . . to kento, to mwana ya Nzambi, yina me butuka na Mpeve ya Nzambi, ke manga Ndinga ya Nzambi? Ntangu, Nzambi Yandi mosi tendulaka Yawu mpe tubaka, “Yayi kele Yawu. Mu silaka Yawu. Yawu yayi,” na kulakisaka Yawu kaka pwelele mutindu Yawu lenda. Mbote, bawu kele ya kukangama na kumona Yawu. Beno me mona? Wapi mutindu Klisto lendaka manga Ndinga ya Yandi Mosi? Mpe kana Klisto kele na kati ya beno, Yawu lenda manga ve Ndinga ya Yandi Mosi.

⁹³ Na yina wapi mutindu beto ke kota na kati ya Nzutu yayi? Ya Ntete ya Corinthiens 12, “Na nzila ya Mpeve mosi beto nyonso kele ya kubotama na kati ya Nzutu yayi, na nzila ya mbotika mosi ya Mpeve-Santu.” Ti, kana beno zola kusonika yawu, ya kele ya Ntete ya Corinthiens 12:13. “Mpe na nzila ya Mpeve mosi beto nyonso kele ya kubotama.” Mpe Mpeve kele Luzingu ya Klisto. Ya kele kieleka? Luzingu ya Klisto! Mpe luzingu ya konso nkuna. . . Na yina, Yandi vwandaka Nkuna ya Ndinga, ke nataka Nkuna na Luzingu. Beno me bakula yawu? Kana Luzingu yina—kana Luzingu yina kele ya kuvwanda na kati ya Nkuna, mpe mbotika yayi ya Mpeve-Santu ke kwiza na zulu ya Yawu, ya kele ya kukangama na kunata Nkuna yina Luzingu.

⁹⁴ Mutindu mu tubaka na beno, awa na Phoenix, ntama mingi ve. Mu vwandaka solula na Mpangi John Sharrit. Mu vwandaka kuna, mpe yandi lakisaka munu yinti, yinti ya bambuma. Yandi—yandi basisaka bambuma mingi ya bayinti ya bambuma. Mpe yandi lakisaka munu yinti mosi, ya vwandaka na mitindu nana to yivwa ya mitindu ya bambuma na zulu ya yawu. Mpe mu tubaka, “Mpangi Sharrit, wapi mutindu ya yinti ya kele?”

Yandi tubaka, “Yinti ya malala.”

Mu tubaka, “Samu na yinki kele citron, mpe mandarine, mpe tangelo, mpe pamplemousse?”

Yandi tubaka, “Ya kele nyonso bayinti ya bambuma. Ba me namika bawu.”

“Oh,” mu tubaka, “Mu me mona. Ntangu yayi, na mvula ke kwisa, ya ke vwanda kaka na ba- . . .”

⁹⁵ “Oh, ve. Konso yinti ke buta mbuma ya yawu mosi. Konso divala ke buta mbuma ya yawu mosi.”

⁹⁶ Mingi ya beno bambuma ke mena zaba yawu, awa na kiwanda yayi ya bambuma. Ya ke buta ya yawu mosi. Beno ke tula kintala ya malala ya ngayi na yinti ya malala, ya ke buta malala ya ngayi, samu ti ya kele nkadulu ya mbuma ya yinti ya bambuma. Kasi, ya ke buta ve mbuma ya ntete.

Mpe ya kele yina beto me sala. Beto me bwela, me baka na ba-credo, mpe nyonso yankaka yina, mpe me bwela mosi na mosi, awa. Wapi mutindu ba-Methodiste lendaka buta kima yankaka kasi mwana ya ba-Methodiste? Wapi mutindu denomination mosi lendaka buta kima yankaka kasi mwana ya denomination?

⁹⁷ Kasi kana yinti yina me basisaka divala ya kisina, ya ke buta malala.

Mpe na yina kana Nzambi ke salaka kima mosi na kati ya Dibuundu, ya ke vwanda ya kisina, ya ke vutuka diaka na Ndinga. Kieleka. Ya fwana vwanda, samu ti Luzingu kele na kati ya Yinti, mpe Yawu ke pesa mutindu ya Yawu mosi.

⁹⁸ Ntangu yayi, ntangu beto ke tala, ntangu yayi, ya kele na dibuundu yango ya nene yina me kulumuka, na kati ya bansungi, na kunataka mbuma ya yawu. Mpe mutindu bintala bikaka, ba katulaka yawu. Na Santu Jean 15, ata mbala mosi ve basisaka Vinu, ntangu yayi. Yandi katulaka bintala, zengaka yawu, samu ti bawu vwandaka pesa mbuma mosi ve. Mpe—mpe beto. . .

⁹⁹ Yesu ke zola mbuma ya, samu na Yandi mosi. Kento ya Yandi fwana buta mutindu ya bana yina Yandi kele.

Na yina, kana ya ke buta ve bana, bana ya Kento ya makwela, bana ya Ndinga, na yina ya kele mwana ya denomination. Na yina, zola ya yandi ya ntete, samu na yinza mpe dénomination, yandi me vutuka na yawu. Mpe ya lenda basisa ve Muklisto ya kieleka, ya kisina, yina me butuka mbala zole, samu ti ya kele ve na kima kuna samu na kubasisa Yawu.

¹⁰⁰ Kaka mutindu kana beno baka kintala ya malala ya ngayi mpe beno kotisa yawu na kati kuna, ya ke nata citron, kasi ya lendaka ve kunata dilala, samu ya vwandaka ve kuna na mbandukulu. Kasi ba tumaka yawu na mbandukulu, luzabu ya Nzambi, yina ba soolaka ntete mpe yina butukaka, ya fwana basisa dilala. Ya lenda ve kunata kima yankaka.

¹⁰¹ Ya kele mutindu na Dibuundu na Nzambi ya moyo, ntangu ngunga ke kwiza. Muntu nyonso. . . Beno bika Nzambi kubanda na kusala kima mosi, muntu nyonso kele na balo mpe me kwenda. Beno me mona? Ya ke vwandaka ntangu nyonso mutindu yina.

Mu vwandaka tanga na disolo, ya Martin Luther, awa ntama mingi ve. Yandi tubaka, “. . . Ya vwandaka ve mpasi mingi na kukwikila ti Martin Luther teleminaka dibuundu ya Katolika mpe kuzwa yawu. Kasi,” yandi tubaka, “kima ya ngitukulu, ti yandi lendaka telemisa yintu ya yandi na zulu ya bufanatiki nyonso yina landaka réveil ya yandi, mpe dyaka kuvwanda ya kusungama na kunungisama ya yandi.” Beno me mona? Bima nionso, bakumekula mpe bima nionso, landaka yandi.

¹⁰² Beno tala Mama Semple McPherson, Aimee Semple McPherson, yina vwandaka na tempelo yayi awa. Kento ya

mulongi nyonso vwandaka na mapapu yango, mpe vwandaka nata Biblia mutindu mosi, kaka—kaka bakumekula ya nsuni!

Ba lenda vwanda ve ya kieleka. Ya kele mutindu mabuundu lenda vwanda ve. Beno bika dibuundu mosi kuzwa kima yankaka na mbanza, dibuundu yankaka lenda ve kukanga ntima na yawu. Ba ke bakula yawu. Beno me mona? Bawu kele dyaka ve ya ntete.

Ndinga ya Nzambi kele ya kisina. Ya kele Ndinga, mpe Yawu fwana basisa mutindu ya Yawu; Mutindu ya yawu na nsungi ya Yawu, ya kusolama, bayina soolaka na ntwala na nzila ya Tata, Nzambi.

¹⁰³ Ntangu yayi wapi mutindu beto ke kota na kati ya Dibuundu yayi? “Na nzila ya Mpeve mosi beto nyonso kele ya kubotama na kati ya Nzutu mosi yayi, Nzutu ya Klisto,” yina kele Kento ya makwela, Ndinga. “Kubotamaka na kati kuna na nzila ya Mpeve-Santu.”

¹⁰⁴ Ntangu yayi beto tala kana beto kele na nsungi ya nsuka, to ve. Ntangu yayi beto ke mona, kana beto vutuka na Genèse, na yina me tala, oh, na kapu ya 5, beno lenda baluka mpe na Luc mpe kutala, ti Enoch vwandaka ya sambwadi kubanda Noé. Enoch.

Kuna me baka nkuna ya nyoka. Samu ti, kana Cain vwandaka mwana ya Abel, na yina yandi vwandaka ya nana. Beno me mona? Kasi kisika mosi ve na kati ya Biblia ya ke tuba ti Cain vwandaka mwana ya Abel . . . to Cain—to Cain vwandaka mwana ya Adam. Samu, ti, Biblia ke tuba, “Yandi vwandaka ya dyabulu yango.” Mpe Adam vwandaka ve muntu ya yimbi. Beno me mona? “Yandi vwandaka ya dyabulu.”

¹⁰⁵ Ntangu yayi beto ke mona awa ti Enoch vwandaka ya sambwadi kubanda na Noé, yina vwandaka kifwanikusu ya bansungi ya dibuundu. Ntangu yayi, bantu nyonso yankaka, na ntwala ya yandi, kufwaka, kasi ba zangulaka Enoch. Enoch zangukaka, ya sambwadi, na kulakisaka ti ya kele nsungi ya dibuundu ya sambwadi yina ke baka Enlevement. Ntangu yayi, ya kele ve na ntembe, beto kele na nsungi ya dibuundu ya sambwadi. Beto nyonso zaba yawu.

¹⁰⁶ Ntangu yayi, ya kele nsungi ya dibuundu ya sambwadi yina ke baka Enlevement. Nyonso yankaka sambanu kufwaka. Kasi ba zangulaka Enoch, samu ti, “Ba monaka Yandi ve. Nzambi bakaka yandi.” Kasi Enoch, zangukaka, vwandaka kifwani ya bayina yankaka nyonso vwandaka kufwa. Kasi ba ke bokila Kento ya makwela ya ntangu ya nsuka . . . Enlevement, kukondwa lufwa, ba ke bokila yandi na kubasika na nsungi ya dibuundu ya sambwadi, yina beto ntangu yayi ke na kupesa kimbangi ya nsungi yina. Oh, la la! Beto timuna ntangu yayi, na mudindu mingi. Beno me mona?

¹⁰⁷ Ntangu yayi, awa, mpe, kifwani ya bansungi sambwadi ya dibuundu, yina, na Apocalypse 10:7, ti mansweki ya nene ya Buku ke zibuka na nzila ya Nsangu ya wanzio ya sambwadi.

¹⁰⁸ Ntangu yayi, ya kele na Munati-nsangu na zulu, ntangu nyonso, mpe munati-nsangu na zulu ya ntoto. Mpova ya Kingelezi *wanzio* zola kutuba “munati nsangu.” Mpe na Nsangu ya wanzio ya sambwadi, na yina yandi vwandaka sala yandi kutuba, ministele ya yandi, “na yina ntangu yandi bandaka na kubula ministele ya yandi,” ve ntangu yandi bandaka.

Yesu, ntangu Yandi bandaka na kubasika, Yandi bandaka na kubelusa bambevo mpe bantu ya mpasi. “Oh, Rabbi yina ya nene! Yandi kele Profete.” Muntu nyonso zolaka Yandi na dibuundu ya yandi.

Kasi ntangu Yandi vwandaka kilumbu mosi, mpe tubaka, “Munu na Tata ya Munu kele Mosi,” yina vwandaka luswaswanu. Yina vwandaka luswaswanu. “Mpe kana beno kudia ve nzutu ya Mwana ya muntu, mpe beno kunwa Menga ya Yandi, beno ke na Luzingu ve na kati ya beno.”

“Kasi, Yandi kele vampire!” Beno me mona? Beno me mona? Ya vwandaka luswaswanu.

Yandi tendulaka yawu ve. Bawu monaka yimeni kumonisama, nsiamisa ya Ndinga ya Nzambi samu na nsungi ya Yandi, salaka kieleka mpe nsiamisaka na bawu ti Yandi vwandaka Munati-nsangu ya nsungi yina. Mpe Yandi zolaka ve kutendula kima mosi.

¹⁰⁹ Bilandi yina zolaka vwanda ve na kiyeka ya kutendula Yawu. Kasi bawu kwikilaka Yawu, kana bawu lendaka kutendula Yawu to ve. Bawu vwandaka kaka swi mpe kwikilaka Yawu. Wapi mutindu bawu zolaka tuba kana bawu zolaka kudya nsuni ya Yandi mpe kunwa Menga ya Yandi? Samu na yinki, ya zolaka salama ve samu na bawu na kusala yawu. Kasi bawu kwikilaka Yawu, samu ti bawu vwandaka ya kutumama. Yesu tubaka Yandi “solaka bawu ntete mbandukulu ya yinza.” Beno me mona? Bawu kwikilaka Yawu. Kana bawu lendaka kutendula Yawu, to ve, bawu kwikilaka Yawu kaka.

¹¹⁰ Ntangu yayi beno tala mbote, ntangu yayi, na nsungi ya dibuundu ya sambwadi, “Ntangu wanzio ya sambwadi ke banda na kubula, mansweki ya Nzambi ke zabana kaka kuna,” Bidimbu.

Ti, basungiki yina...ba vwandaka na ntangu. Luther zingaka mingi ve, to dyaka Wesley. Bansungi zingaka mingi ve, basungiki yayi. Bawu vwandaka na nsangu ya bawu ya kilumbu yina, mpe bantu yina bakulaka yawu mpe salaka yawu denomination. Mpe yinki ya kele?

111 Beno lenda ata mbala mosi ve kubula yinza. Yinza ke salaka ntangu nyonso kimbangi. Nzambi ke tambulaka na kulandila na yinza. Ya fwana sala yawu.

Mutindu mwini. Mwini ke basikaka na suka, ya kele mwa bébé yina me butuka. Ya kele ya kulemba, ya kele ve na tiya mingi samu na yawu. Ngunga ya kumi, ya ke basika na lukolo ya bambuta. Kati-kati ya kilumbu, ya ke kota na luzingu. Na ngunga ya tatu na manima ya midi, ya ke kuma kiboba. Na ngunga ya tanu, ya ke kufwa. Kiboba mpe ya kulemba diaka, ke vutuka na ntoni. Yina kele nsuka ya yawu? Ya ke vumbuka diaka, na suka yina ke landa. Beno me mona?

112 Beno tala bayinti, mutindu ba ke basisaka makasa ya bawu, nyonso yina bawu ke salaka. Ntangu yayi beto ke mona ti, makasa ke katuka na yinti, ke vutuka. Yinki? Luzingu ke kulumuka na nsimbulu ya yinti. Ya kele nsuka ya yawu? Ke vutuka na printemps yina ke landa, na luzingu ya malu-malu.

113 Ntangu yayi beno tala mbote mabuundu, mutindu ya salaka kima mutindu mosi na Kusungika. Ya basikaka. Mbuma yango ya blé kubwaka na ntoto mpe kufwaka, na yisi ya lukwamusu ya nsungi ya mpimpa. Ya kotaka na ntoto. Ya zolaka kufwa. Muntu nyonso, ya kimpeve, lenda mona yawu. Ti, na boma ti nkuna yina kufwa mpe kupola, yawu ke zinga yandi mosi. Mpe yawu zolaka kwenda na ntoto, na yisi ya nsungi ya mpimpa. Ya lalaka kuna, ya kupola. Mpe basikaka na mwa bintala zole ya dibuundu ya Luther. Na ngaanda ya dibuundu ya ba-Lutherien, basisaka bintala mingi, Zwingli mpe nyonso yankaka yina. Kubanda yina me basika na fololo ya disangu, yina vwandaka John Wesley, nsungi ya nene ya ba-missionaire. Ya kubwaka. Kuna basikaka nsungi yango ya luvunu, nsungi yango ya Pantekote. Mbuma yango ya blé, yina . . .

114 Muntu nyonso yina, awa, me buta ntete blé mosi? Beno tala blé yango ntangu beno ke tala yawu. Ntangu beno ke basika kuna, beno ke tuba, “Mu kele na blé.” Beno ke talana mutindu ti beno kele na blé kuna. Beno zibula yawu kieleka mbote mpe beno tala mbote. Beno kele ve na blé ata fyoti ve. Beno kele na mpusu. Yesu kebisaka beto ve ti, na Matthieu 24:2 . . . -yiya? “Na bilumbu ya nsuka, ti, bampeve nyonso zole ke vwanda ya kubelama mingi kintwadi, ya ke vuna blé yina ba soolaka yawu mosi kana ya lendaka salama.” Beno me mona? Ntangu yayi beno tala mbote. Ya kele munati.

115 Ntangu yayi, Luzingu yina kwizaka na nzila ya Luther vwandaka yina salaka Wesley. Luzingu yina basikaka na Wesley kele yina salaka Pentecote. Luzingu yina basikaka na Pentecote salaka blé. Kasi ba kele minati. Beno me mona? Luzingu ya kieleka ke luta kuna. Nsangu ke luta, kasi Yawu ke na kulutaka na blé. Ya kele samu na yina blé me basika mpe me nata kima ya muvimba na Enlevement, awa na zulu. Kento ya makwela, Yawu

mosi, ke basika na konso nsungi. Kasi yinti ya denomination ke kufwaka, ke mata mpe ke kufwa. Beno me tala, bilumbu yayi ya nsuka, wapi mutindu ya ke banda na kukatuka ntangu yayi? Ntangu blé yango ke banda na kukula, kuna mpusu ke banda na kukwenda ntama na Yawu.

¹¹⁶ Beno tala na manima na mwa blé yango ntangu beno ke tala yawu. Beno zibula yawu mutindu *yayi*, mpe beno tala na kati ya yawu mpe beno mona. Beno kele na mwa bifulu ya blé na manima kuna. Beno fwana baka microscope yina ke kumisaka yawu nene bambala makumi tatu samu na kutala kuna na kati, samu na kumona mwa fololo ya blé yina kele kuna na kati. Beno me mona?

Ya kele ntama kuna na manima, kasi Yawu ke banda na kukula. Ntangu yayi, mpusu yina fwana vwanda kuna, samu na kukeba Yawu, samu na kupesa Yawu siansi ya kubasika. Kasi na yina ntangu Yawu ke banda na kukula mpe Nsangu ke banda na kukuma mingi, kuna mpusu ke kwenda ntama na Yawu. Mpe Luzingu ke basika kaka na mpusu yina, mbala mosi na kati ya blé. Ke landila na kukwenda! Ya kele mutindu konso nsungi ke salaka. Ya—ya lenda kaka ve kubula yinza. Ya kele. . . Ya kele kulandila ya Nzambi, mutindu Yandi ke salaka bima.

¹¹⁷ Mpe ntangu yayi ya kele nsungi yina beto ke na kuzinga kaka ntangu yayi, nsungi ya dibuundu ya sambwadi. Ntangu yayi, ya kele nyonso kumonisama na mbuma ya blé na nsuka, yankaka ke vutuka. Ntangu yayi, kana beno baka Luc kapu 17 mpe nzila ya 30, Yandi tubaka, “Mutindu ya vwandaka na bilumbu ya Sodome, mutindu mosi ya ke vwanda na nkwizulu ya Mwana ya muntu, ntangu Mwana ya muntu ke banda na kumonisama Yandi mosi.” Yinki kele *kumonisa*? Ke sala luzayikisu ya Yandi ya yina Yandi kele na kilumbu yayi. Kumonisa, na bantu. Ndinga yina me zabana samu na kilumbu. Kumonisa, na bantu, na nzila ya kumonisama ya Mpeve-Santu na kusalaka ti Yesu kuzinga na kati-kati ya beto. Mpe, beno bambuka moyo, Yandi monisamaka kuna na kati ya muntu. Bakala! Yandi tubaka, “Mutindu ya vwandaka. . .” Ntangu yayi, Yandi tangaka Biblia mosi yina beto tangaka, Genèse. Ntangu yayi, beto ke tala na kapu yango ya Genèse kuna, ntangu Yesu vwandaka zonzila yawu.

¹¹⁸ Beto ke mona kuna, ti, na yina, na mukongo ya Yandi ya kubaluka na tenta yina, mpe Sarah na kati ya tenta. Yandi tubaka, Yandi yifulaka kiuvu mosi. Mpe yandi kwikilaka ve ti yina ke salama lendaka salama. Yandi tubaka, “Ntangu yayi, Abraham, mu ke kwiza tala nge landila na ntangu ya luzingu.” Beno me mona? Mpe Sarah, na kati ya tenta, sekaka samu na yawu. Yandi tubaka, “Samu na yinki Sarah me seka, na kati ya tenta, na kutubaka, ‘Wapi mutindu bima yayi lenda vwanda?’”

¹¹⁹ Yesu silaka. Mpe Yina vwandaka Yandi. Abraham bokilaka Yandi, “Elohim,” ya Ngolo nyonso. Ya vwandaka Yandi. Ntangu

yayi, Biblia zabisaka na ntwala ti ya ke vutuka diaka na bilumbu ya nsuka. Yesu tubaka mutindu yina. “Mpe ntangu beno ke mona bima yayi kusalama,” beno bambuka kaka moyo, ntangu yayi ke banda na kusalama mutindu yina kuna, ti, “beno zaba ti ntangu me belama na kielo.”

¹²⁰ Beno tala yinza yawu mosi. Beno tala yinza, Sodome, kana ya me vwandaka ntete na Sodome. Beno tala bantu yina kubeba na kubeba ya mutindu yayi. Mabanza ya bawu me beba. Bawu zaba ve yinki bumuntu ya bantu yayi. Beno tala bayina ke teleminaka misiku. . . [Kisika ya mpamba na bande—Mu]. . . -sexuel mpe nionso yina.

Mpe beno tala bakento ya beto, mutindu ya nkadulu yina ba ke na yawu. Beno tala mutindu ya nkadulu ya yimbi ke na kulandila, mambu ya nsoni na kati ya bakento ya beto. Mpe kaka ve ya beto. . .

Beno ke tuba, “Ya kele ba-Methodiste.” Ya kele ba-Pentecotiste, mpe. Ya kele kima ya muvimba.

¹²¹ Beno tala bantu ya beto. Bawu ke kangama, na kisika ya Ndinga ya Nzambi, na mwa kinkulu ya denomination. Bawu ke kangama na yawu, na kisika ya kubasika ntangu bawu ke mona Nzambi kusala Yandi mosi kuzabana na mutindu ya kulunga. Ya kele samu na yina, bawu kele ya kufwa meso. Bawu lenda ve kumona Yawu. Ata mbala mosi ve ti bawu ke mona Yawu.

Ntangu yayi beno tala mbote yina ke salama awa na yayi, na yina beto ke sala nswalu.

Mu banza ti mama yina zola ti beto katuka. Mu monaka yandi kusala diboko ya yandi kutambula, kima yankaka na zulu ya yandi zola ti beto basika, na yina beto ke sala mbote na kusala nswalu.

¹²² Na yawu ntangu yayi beno tala Enoch, kifwanukusu ya Dibuundu. Awa yandi kele mpe kifwanukusu na nsungi ya sambwadi ya dibuundu. Beno lenda banza na yawu? Nsungi ya dibuundu ya sambwadi! Beno tala. “Na muningu ya. . .”

¹²³ Bantu yikwa ke kwikila ti ya me vwanda na minati-nsangu sambwadi samu na nsu- . . . ? Oh, beto nyonso ke kwikilaka yawu, kana beto ke kwikilaka Biblia. Kana beto ke kwikilaka ve na Biblia, ya kieleka, beno me mona, beto ke kwikilaka yawu ve. Kasi, ya vwandaka.

¹²⁴ Ntangu yayi beto ke na kuzinga na nsungi ya dibuundu ya sambwadi. Mpe ntangu Biblia ke tuba ti, nsungi ya dibuundu ya sambwadi yayi, “Ntangu munati-nsangu ya nsungi ya dibuundu ya sambwadi ke banda na kubula Nsangu ya yandi, ti mansweki ya bima nyonso yina me tambula mbote ve, nzila nyonso ya nsungi, ke monisama pwelele na ntangu yina.” Awa beto ke mona yawu, Mwana ya muntu kukwiza na kati-kati ya bantu ya Yandi mpe kusala kaka kieleka, na kusiamisaka Nsangu ya

Yandi mutindu Yandi tubaka ti Yandi ke sala. Awa beto ke tala yawu, na nsungi yayi ya nsuka.

¹²⁵ Ntangu yayi, mpe bangunga sambwadi ya mpimpa, mutindu montele sambwadi, ya ntangu ke kwiza, yandi kwizaka ve montele ya ntete, ya zole, ya tatu, ya yiya, kasi kotaka na ngunga ya sambwadi. Ya vwandaka Enoch, ya sambwadi, yina ba zangulaka. Mpe Noé, na kuvwandaka kifwanusu ya bayina bikanaka ya ba-Juif, fwana natama na zulu. Ntangu yayi, na bantangu ya Biblia, na kuzonzaka na yina me tala bantangu ya mpimpa. Mpe bampimpa vwandaka ve ya kukabula na bangunga, na ntangu ya Biblia.

¹²⁶ Ntangu yayi beno kuwa mbote. Na yina, mu ke sala nswalu ntangu yayi, samu ti bawu keke na nsatu ya kivinga. Ve. Biblia vwandaka ve ya kukabuka, to—to. . .

¹²⁷ Mpimpa vwandaka ve ya kukabula na bangunga, na ntangu ya Biblia. Ya vwandaka ya kukabula na kati ya bakuvumbuka. Ya vwandaka na bakuvumbuka tatu. Ntangu yayi, kuvumbuka ya ntete bandaka na ngunga ya yivwa tii na ngunga ya kumi na zole. Kuvumbuka ya zole bandaka na ngunga ya kumi na zole tii na ngunga ya kumi na tatu. Mpe kuvumbuka ya tatu ya mpimpa vwandaka banda na ngunga ya tatu tii na sambanu. Ntangu yayi beto keke na tatu, tatu fwokula na tatu, yina keke yivwa, yina keke ntalu ya kulunga ve. Na manima beto ke vutuka na sambwadi samu na Enlevement, yina ke salama, Mu banza, na kati-kati ya ngunga sambanu na ngunga ya sambwadi. . . to ngunga sambanu na yivwa, na suka mosi. “Samu mpungi ya Mfumu ke bula.”

Na suka yina ya kulezima mpe matuti ntangu bantu ya kufwa na Klisto ke vumbuka,
Mpe nkembo ya mvumbukulu ya Yandi ke na kukabula;
Ntangu baya Yandi yina ba soolaka ke vukana na bayinzo ya bawu na manima ya dizulu,
Ntangu ba ke bokila rulo kuna, mu ke vwanda kuna.

¹²⁸ Mpova *enlevement*, na kati ya Biblia, keke ata fioti ve. Beto me tula kaka ndinga yina kuna. Biblia me tuba, “ba me zangula; yina ba me zangula.” Beto ke tanga awa na ba-Théssalonicien ya Zole. . . To, ba-Théssalonicien ya Ntete, ya keke lutumu ya Enlevement ya nene yayi yina ke salama na bilumbu ya nsuka. Beno kuwa yayi awa. Beto ke banda awa na nzila ya 13:

. . . Mu ke zola ve ti beno. . . yina zaba kima ve, bampangi, samu na bayina keke ya kulala, ti beno vwanda ve na kiadi, mutindu bayankaka yina keke ve na kiwuwu.

Samu ti kana beto ke kwikila. . . Klisto kufwaka mpe vumbukaka dyaka, mpe na yawu bawu. . . bayina lalaka na Yesu ti Nzambi ke nata bawu na yandi.

Samu ti beto ke tuba yayi na beno na nzila ya ndinga ya Mfumu, ti beto yina ke zinga mpe ke bikala tii na nkwezulu ya Mfumu ke kanga nzila ve . . . (Mpova yayi zola kutuba kukanga nzila “kukanga nzila.”) . . . bayina kele ya kulala.

Samu Mfumu yandi mosi ke kulumuka . . .

Ntangu yayi beno kuwa mbote:

. . . Mfumu yandi mosi ke kulumuka na mazulu na kuboka, mpe na ndinga ya archange, mpe . . . mpungi ya Nzambi: mpe bantu ya kufwa na Klisto ke vumbuka ntete: . . .

¹²⁹ Ntangu yayi mu zola beno kutala kima ya nene yina ke na kusalamaka awa ntangu yayi. Beno kondwa yayi ve. Beno me mona? Ntangu yayi beno tala. Ndinga ke tuba awa, na ba-Théssalonicien ya Zole, ti ya kele na bima tatu. Beno tala. Kubanda na nzila ya 13 tii na nzila ya 16, ya kele na bima tatu yina fwana salama na ntuala ya Mfumu Yandi mosi ke monika. Na nswalu ntangu yayi, samu beto sukisa. Beno me mona? Kima ya ntete ke salama . . . Beno tala: kuboka, ndinga, mpungi. Beto tanga Yawu ntangu yayi mpe beto mona kana ya kele kieleka. Beno me mona?

Samu ti Mfumu yandi mosi (nzila ya 16) ke kulumuka na mazulu na kuboka, mpe na ndinga ya archange, mpe . . . mpungi ya Nzambi: . . .

¹³⁰ Bima tatu ke salamaka: Ndinga . . . Kuboka, ndinga, mpungi, fwana kusalama ntete Yesu kumonika. Ntangu yayi, kuboka . . . Yesu ke salaka nyonso tatu ya bawu ntangu Yandi kele—Yandi kele—Yandi kele—Yandi ke na kukulumuka.

Kuboka, yinki kele kuboka? Ya kele Nsangu yina ke na kulongama, ntete, Dimpa ya moyo ya Luzingu ke na kubasisa Kento ya makwela.

¹³¹ Ntangu yayi, Nzambi kele na mutindu ya kusala bima. Mpe Yandi ke sobaka ata fioti ve nsalulu ya Yandi. Yandi ke sobaka ata fioti ve ki- . . . Yandi kele Nzambi yina ke sobaka ve. Na Amos 3:7, Yandi tubaka ti Yandi ke sala kima mosi ve na zulu ya ntoto tii kuna Yandi ke monisa yawu na bisadi ya Yandi baprofete. Mpe kaka kieleka mutindu Yandi silaka yawu, Yandi ke sala yawu.

¹³² Ntangu yayi, beto me luta na kati ya bansungi ya dibuundu. Kasi ba silaka beto na bilumbu ya nsuka, landila Malachie 4, ti ya ke vwanda na kuvutuka dyaka, profete na yinsi. Ya kele kieleka. Beno tala nkadulu ya yandi, mutindu yandi ke vwanda. Yandi kele ntangu nyonso . . .

Nzambi ke sadilaka mpeve yango bambala tanu: mbala mosi na kati ya Elie; na kati ya Elisée; na kati ya Jean-Baptiste; ke bokilaka Dibuundu; mpe bayina bikanaka ya ba-Juif. Bambala *tanu*, “lemvo,” J-e-s-u-s [Y-e-s-u], f-a-i-t-h [l-

u-k-w-i-k-i-l-u—Mu.], mpe ya kele lutangu ya lemvo. Beno me mona? Mbote mingi.

¹³³ Ntangu yayi, beno bambuka moyo, ba silaka Nsangu. Mpe ntangu mansweki nyonso yayi me vwanda nyonso na kati ya muvusu na nkonga ya banganga-Nzambi, ya ke baka profete ya mbala mosi na Nzambi samu na kumonisa Yawu. Mpe ya kele kieleka yina Yandi silaka na kusala. Beno me mona?

¹³⁴ Ntangu yayi, beno bambuka moyo, “Ndinga ya Mfumu ke kwisaka na profete,” théologien ve. Profete, yandi kele kimonikisi ya Ndinga ya Nzambi. Yandi lenda tuba kima ve; yandi lenda tuba ve mabanza ya yandi mosi. Yandi lenda zonza kaka yina Nzambi ke monisa. Ata mpe na profete Balaam ntangu yandi mekaka na kuteka bamuswa ya yandi, kuteka bamuswa ya yandi, yandi tubaka, “Wapi mutindu profete mosi lenda tuba kima mosi kasi yina Nzambi ke tula na yinwa ya yandi?” Ya kele kima yina Nzambi ke salaka, ti beno lenda tuba kima yankaka ve. Mpe beno me butuka mutindu yina. Kulutila ve ti beno lendaka . . .

¹³⁵ Kana beno lenda tuba, “Mu—mu—mu lenda fungula ve meso ya munu,” ntangu beno ke tala. Beno me mona? Beno lenda ve. Beno lenda ve kutanda diboko ya beno, ntangu beno lenda. Beno me mona? Beno lenda vwanda ve yimbwa ntangu beno kele muntu. Beno me mona? Ba me sala beno kaka mutindu yina.

Mpe Nzambi ke vwandaka ntangu nyonso, mpe, na bansungi, na nzila ya Ésaïe, Jérémie mpe nyonso, Élie, na bansungi yina lutaka. Ntangu kimvuka ya banganga-Nzambi kotisaka muvusu na bima nionso, Yandi ke tinda profete mosi, Yandi ke basisa yandi na kisika yina me zabana ve. Yandi ke kota ve na mosi ya mambu ya bawu, mpe yandi fwana samuna Ndinga ya Yandi. Ba bokilaka yandi na kusalu, mpe ba kwendaka, kaka bantu ya mambu ya ngolo ya Kieleka ya Nzambi. Mpe ya kele ntangu nyonso mutindu beno lenda tuba na yandi. Yandi tubaka, “Kana ya kele na mosi na kati-kati ya beno yina kele ya kimpeve to profete . . .”

¹³⁶ Ntangu yayi, baprofete. Ya kele na kima mutindu “dikabu ya profesi” na kati ya Dibuundu; kasi profete kele ya kusoola na ntwala mpe ya kukubama samu na ngunga. Beno me mona? Yinga, tata. Ntangu yayi, kana profesi ke basika, zole to tatu fwana vwanda mpe ke fundisa kana ya kele kieleka to ve, ntete dibuundu kuzwa yawu.

¹³⁷ Kasi muntu ve vwandaka na ntwala ya profete, samu ti yandi vwandaka—yandi vwandaka kieleka Ndinga ya Nzambi. Yandi vwandaka Ndinga yina na kilumbu ya yandi. Beno monaka Nzambi ke talisa. Ntangu yayi, Nzambi silaka na kutinda beto dyaka yawu na bilumbu ya nsuka, samu na kubasisa Kento ya makwela na kati ya mvindu ya dibuundu yina, na mutindu mosi kaka ya lendaka salama.

¹³⁸ Ata mbala mosi ve ti ya ke salama; dibuundu lenda ve kuzwa Klisto. Beto, ba-Pentecotiste, beto lenda ve kunata Nsangu yayi na mutindu dibuundu kele bubu yayi. Wapi mutindu beto ke baka ntangu ya nsuka na mutindu ba kele bubu yayi, ntangu bantu nionso me telemina mosi na yankaka, mpe bima nionso yankaka, mpe nionso kele kaka ya bunganga-Nzambi? Oh, kyadi! Ya kele mvindu. Ya me kwenda na ba-denomination. Mpe ntangu nyonso . . . Mu ke lomba na muntu nyonso ya masolo na—na—na kutuba mutindu ya luswaswanu. Konso ntangu yina nsangu basikaka na ntoto, mpe ntangu bawu kubongisaka yawu, ya kufwaka kaka kuna. Mpe Pentecote salaka kima mosi yina bawu nyonso salaka, Pantekote yina basikaka.

¹³⁹ Beno, ba-Assemblée de Dieu, ntangu bankooko ya beno mpe bamama ya beno kubasikaka na ba-organisation ya bawu kuna, na ntangu ya ntama ya Concile Général, vwandaka boka mpe vwandaka kumisa Nzambi, mpe vwandaka tuba yimbi samu na bima yina. Mpe beno ke baluka, “mutindu yimbwa na yina yandi me luka, mpe ngulu na poto-poto ya yandi,” mpe me sala kima mutindu mosi na yina bawu salaka. Mpe ntangu yayi beno kele ya kusungama mingi, ti beno me kanga kifundu ya beno ya kyadi. Beno fwana kuvwanda na kalati ya kimpangi ntete ba lunga vukana na beno, na mpasi.

¹⁴⁰ Beno, ba-Unitaire, Nzambi pesaka beno nsangu ya mutindu yina, mpe na kisika ya beno kukwenda na ntwala, mpe na kubikanaka kaka ya kukikulumusya mpe beno zolaka kukatuka mpe kubongisa kimvuka ya beno. Mpe wapi kisika beno kele? Kantini mosi. Ya kele kieleka.

Mpe Mpeve ya Nzambi, ke landila na kukwenda na ntwala. “Munu Mfumu ke na kukuna Yawu. Mu ke mwangisa Yawu masa, na mwini mpe na mpimpa. Mu lendaka ve. . .” Yandi tumaka bima yayi na kuvwanda, mpe Yandi fwana fidisa Yayi.

¹⁴¹ Kima ya ntete ke kwiza, ntangu Yandi ke banda na kukulumuka na Mazulu, ya kele na kuboka. Yinki ya kele? Ya kele Nsangu, samu na kuvukisa bantu kintwadi. Nsangu ke basika, ntete. Ntangu yayi, ntangu ya kusala mwa maza, “Beno telama mpe beno pelisa minda ya beno.” Yinki kuvumbuka yayi ya vwandaka? Ya sambwadi, ya kele ve ya sambanu. Ya sambwadi, “Tala, Bakala ya makwela ke na kwiza. beno telama mpe beno pelisa minda ya beno.” Mpe bawu salaka. Bayankaka na kati ya bawu monaka ti bawu vwandaka ve na Mafuta na mwinda ya bawu. Beno me mona? Kasi ya kele ntangu ya kukubika minda.

Ya kele ntangu ya Malachie 4. Yina Yandi sadilaka. . . Kele Luc 17. Ya kele—ya kele Nzi-. . . Profesi nyonso yina Yawu lenda vwanda kieleka ya kusungama samu na kilumbu yayi, na kati ya Masonuku, beto ke mona yawu kuzinga kaka kuna. Ya kele ve. . .

¹⁴² Beno me mona bima yayi kusalama, mpangi ya munu ya bakala ya luzolo, mpangi ya kento. Ntangu, Nzambi na Mazulu zaba ti mu lenda kufwa na estrade yayi kaka ntangu yayi. Beno—beno fwana tambula kaka mwa ntangu fyoti. Ya kele kaka . . . Ya ke yitukisa mingi, ntangu beno ke mona Nzambi ke katuka na Mazulu, ke telama na ntuala ya bimvuka ya bantu, mpe kutelama kuna, kutuba Yandi mosi kaka mutindu Yandi salaka. Mpe ya kele Kieleka, mpe Biblia yayi ke zibuka. Beno me mona? Kieleka. Beto kele awa.

¹⁴³ Mpe sysiteme ya denomination me kufwa. Yawu me zimbana. Yawu ke telama ata fyoti ve. Yawu ke yokama na tiya. Ya kele yina beno ke salaka na mpusu na bilanga. Beno kima ntama na yawu. Beno kota na Klisto. Beno tuba ve, “Mu kele ya Methodiste. Mu kele ya Baptiste. Mu kele ya Pantekote.” Beno ke kota na kati ya Klisto.

Kana beno kele na kati ya Klisto, ya kele ve na Ndinga ya kusonama na kati Awa kasi yina beno ke kwikila Yawu. Mu ke kipe ve yina muntu yankaka me tuba. Mpe na manima Nzambi ke sala kima yina kumonisama. Samu ti, beno, ntangu Yandi ke tsyamuna Mpeve na zulu ya Ndinga, yinki ke salama? Kaka mutindu kutula maza na zulu ya nkuna nyonso yankaka. Ya ke zinga, mpe Yawu ke buta landila mutindu ya Yawu.

¹⁴⁴ Beno ke tuba, “Mu kele na mbotika, Mpeve-Santu.” Yina zola kutuba ve ti beno me kuzwa mpulusu, ve na nzila ya bilumbu mingi.

¹⁴⁵ Beno tala awa. Beno kele muntu ya butatu. Beno kele. Na kati ya mwa muntu *yayi* awa kele moyo, yina ke landa kele mpeve, mpe yina ke landa kele nzutu. Ntangu yayi, beno kele na ba-sense tanu na kati ya nzutu yayi, samu na kukutana na yinzo ya beno na ntoto. Ba ke wisana ve na yina me bikana ya yawu. Beno kele na ba-sense tanu ya mpeve, *awa*: zola mpe konsiansi, mpe nyonso yankaka yina, ya yawu. Kasi na kati *awa* kele kisika *beno* ke zinga. Ya kele yina beno kele.

¹⁴⁶ Yesu tubaka ve, “Mvula ke kubwaka na zulu ya muntu ya mbote mpe na muntu ya yimbi”? Beno tula dititi ya yimbi awa, mpe blé na ngaanda kuna, mpe beno mwangisa maza na zulu ya yawu, mpe ke keba bawu na yisi ya kubuta mbuma mpe bima ya mutindu yina, bawu nyonso zole ke zinga ve na nzila ya maza mosi? Kieleka. Mbote, yinki ya kele? Mosi ya bawu ke buta grateron, samu ti ya kele nyonso yina yandi kele. Grateron ke telemisa maboko ya yandi mpe ke boka kaka mutindu mosi blé.

¹⁴⁷ Biblia ke tuba ve, “Na bilumbu ya nsuka, Baklisto ya luvunu ke kwiza”? Ve “Yesu ya luvunu,” ntangu yayi. “Baklisto ya luvunu,” bapakulami, ya kupakula na mutindu ya luvunu na Ndinga; ya kupakula ya denomination, kasi na Ndinga ve.

Samu ti, Ndinga ke pesa kimbangi ya Yawu mosi. Ya kele na nsatu ya kima yankaka ve. Ya ke pesa kimbangi na Yawu mosi.

“Mpe ya ke kwiza bapakulami ya luvunu.” Beno me kuzwa bande ya munu na zulu ya yawu. Mpe ti dikanda yango . . .

Oh, kana beno bokila mosi ya bawu, beno tuba, “Oh, nge, nge kele Yesu?”

“Oh, kieleka ve.” Ba ke ndima yawu ve.

¹⁴⁸ Kasi ntangu ya ke kuma na “Oh, nkembo! Mu kele na kupakulama!” Mpe ya kele kupakulama ya kieleka. Beno bambuka moyo, Caiphe kuzwaka Yawu, mpe, mpe pesaka profesi. Mutindu mosi Balaam kuzwaka Yawu, mpe pesaka profesi.

Kasi yina kele ve na kima ya kusala na *yayi*, na kati. Kana ti ya vwandaka nkuna ya Nzambi, gene ya Yandi na mbandukulu, yina ba soolaka na ntwala, beno me suka. Mu ke kipe ve lutangu beno ke boka, kuzonza na bandinga, kukima, kuboka. Ya kele na kima mosi ve ya kusala na yawu.

Grateron lenda tanga kaka mingi mutindu bayankaka ya bawu. Mu me monaka mimpani ke telama, mpe ke boka, mpe ke tuba na bandinga, mpe—mpe ke kunwa menga na mukwa ya yintu ya muntu, mpe kubokila diabulu. Beno me mona? Na yawu beno ve . . . Ti mosi ya ba-sensation mpe nyonso yina, beno zimbana yawu.

Ya kele ntima ya beno na kati ya Ndinga yina, mpe ya kele Klisto. Beno nata kuna, mpe beno tala Yawu ke kukitalisa Yawu mosi, kaka mutindu Yawu ke zibuka mutindu nkuna nionso yankaka, mpe ke tuba Yawu mosi samu na nsungi Yawu ke na kuzinga.

¹⁴⁹ Luther zolaka nata kima yankaka ve kasi kinkuku ya matiti. Bayankaka yayi zolaka nata bima yankaka yayi. Beto kele na nsungi ya blé ntangu yayi.

Ba-Lutherien ya kieleka yina kele ba-Lutherien ya kieleka zolaka basisa Lutherien ya kieleka. Pentecote ya kieleka zolaka nata pentecote ya kieleka. Kaka yina. Kasi beto me luta nsungi yina, mpe beto ke landila na kukwenda.

¹⁵⁰ Beno zaba, dibuundu ya Katolika, bandaka, pantekote? Mpe kana dibuundu ya Pantekote zolaka telama bamvula mafunda zole, ya zolaka vwanda yimbi mingi kulutila yina Katolika kele ntangu yayi. Ya kele kieleka. Mu ke tuba yawu na bampangi ya munu ya babakala, bampangi ya munu ya bakento, yina mu zola. Mpe Nzambi zaba yawu. Kasi beno bambuka moyo, bankundi, mu fwana kukutana na beno kuna na Lufundusu. Mpe ya lendaka vwanda ntangu mingi ve. Mu fwana pesa kimbangi ya yina kele Kieleka.

¹⁵¹ Ntangu mu kwendaka na balukutakanu na beno, mu vwandaka sambila samu na bambevo, ya vwandaka mbote. Kasi, ntangu mu me kwiza na Nsangu! Kana Nsangu mosi me basika, ya kele Nsangu ya kieleka . . .

Kana ya kele bimangu ya kieleka, ya kieleka ya Nzambi, mpe ya kele kaka ya kukangama na organisation yina, beno zaba ti ya kele ve ya Nzambi, samu ti kima yango me tubama yimeni.

Yesu kwendaka mpe belusaka bambevo, samu na kukanga meso ya bawu, bantu, na yina Nsangu ya Yandi. Ya kele kieleka.

Ya fwana vwanda na kima yina Nzambi ke lakisa. Yandi kaka . . . Kubeluka ya Kinzambi, bimangu ya Yandi mutindu yina, beno telemisa kaka meso ya bantu. Ntima ya mfunu ya Yawu kele Nsangu. Yawu yina, yina me katuka *awa*. Yandi ke na kumeka na kuzwa lemvo ya bantu, samu ti bawu kuvwanda mpe kuwa Yandi, beno me mona, samu ti ya kele na bayankaka na kati kuna yina kele ya kutumama na Luzingu.

Ndambu ya mbuma, blé, kubwaka na ntoto, bandeke lokotaka yawu. Mpe bayankaka kubwaka na kati-kati ya matiti ya bansende. Mpe bayankaka vwandaka, landilaka na kukwenda na ntoto ya kuyilama, na ntoto ya kuyilama, mpe basisaka.

¹⁵² Ntangu yayi, ya kele kima ya ntete, ya kele muningu. Kima ya ntete kele mpungi mpe . . . to ndinga . . . Kuboka; mpe na manima ndinga; mpe na manima mpungi.

Beno boka: munati-nsangu ke na kukubikaka bantu.

Ya zole kele ndinga ya mvumbukulu: ndinga mosi, yina, ndinga ya ngolo na Santu Jean 1:38-44, yina bokilaka Lazare na ntoni.

Na kuzwaka Kento ya makwela kintwadi; mpe na manima mvumbukulu ya bantu ya kufwa, beno me mona; samu na kuzanguka na Yawu. Ntangu yayi beno tala mbote bima tatu ke salama. Yina ke landa kele yinki? Vwandaka mpungi. Ndinga . . . Kuboka; ndinga; mpungi.

¹⁵³ Ntangu yayi, kima ya tatu, kele mpungi, na yina, ntangu nionso, na Feti ya Bampungu, ke bokila bantu na kusala feti. Mpe yina ke vwanda Madia ya Kento ya makwela, Madia ya Mwana-dimeme na Kento ya makwela, na zulu. Beno me mona?

¹⁵⁴ Kima ya ntete ke basika kele Nsangu ya Yandi, yina ke bokila Kento ya makwela kintwadi. Kima yina ke landa kele mvumbukulu ya Kento ya makwela ya kulala; bayina kufwaka, kuna na bansungi yankaka, ba me kangama bawu kintwadi. Mpe mpungi, Feti na mazulu, na zulu. Mbote, ya kele kima yina ke salamaka, bankundi.

¹⁵⁵ Beto kele kaka kuna, ya kukubama ntangu yayi. Kima kaka mosi, Dibuuundu ke basika, fwana vwanda na ntuala ya Mwana, samu na kuyelisa.

Masini ya nene ya kubuka mbuma ke kwiza, na manima ya mwa ntangu fyoti. Blé ke yokama na tiya, banzinzi, kasi mbuma ke vukana na kibumbulu ya Yawu. Beno me mona?

¹⁵⁶ Beno kele ve bantu ya kufwa meso. Beno kele—beno kele bantu ya mayele.

Mpe kana mu me telama awa mpe kutuba bima yina ke sala mpasi? Mu ke tuba Yawu samu ti Yawu kele Luzingu, samu ti mu kele na kiyeka ya Nzambi na kutubaka Yawu. Mpe mu fwana tuba Yawu. Mpe Nsangu ya munu. . . Ntangu nyonso na kuzabaka, na manima kuna na yisi ya kubeluka ya nzutu mpe nyonso yankaka ya mutindu yina vwandaka kaka samu na kubenda bukebi ya bantu, na kuzabaka ti Nsangu ke kwisa. Mpe Yawu yayi. Mpe Bidimbu Sambwadi yayi me zibuka, mansweki yina, mpe me talisa bima yina me salama. Mu zabaka yawu ve.

¹⁵⁷ Kasi ya kele na bantu ya kutelama kaka awa ntangu yayi, yina vwandaka ya kutelama kaka na munu. Ntangu, beno nyonso kuwaka munu kulonga dilongi yina: *Batata, Wapi Ntangu Yayi?* Na suka yina, kieleka kisika Yawu tubaka ti Ya ke vwanda, kuna telamaka Bawanzio sambwadi ya kutelama kaka kuna, katuka Mazulu. Mpe mutindu Yawu vwandaka mata, mpe kitembo vwandaka baka Yawu na zulu kuna, beto vwandaka ya kutelama, vwandaka tala mbote mutindu Yawu vwandaka kwenda ntama, science bakaka foto ya Yawu, nzila nyonso na bayinsi nyonso, tii na Mexique.

¹⁵⁸ Mpe kuna, ntangu mu vwandaka tala mbote, kilumbu mosi, ntangu mu bandaka na kulonga *Bansungi Sambwadi Ya Dibuundu*, mpe mu bokilaka Jack Moore, théologien ya nene, mu tubaka, “Jack, Nani kele Muntu yayi ya kutelama kuna? ‘Ya kele na Mosi mutindu Mwana ya muntu ya kutelama kuna, bansuki ya mpembe mutindu mika.’” Mu tubaka, “Yandi vwandaka Bakala ya ntwenia, wapi mutindu Yandi lendaka vwanda na bansuki ya mpembe mutindu mika ya dimeme?”

¹⁵⁹ Yandi tubaka, “Mpangi Branham, yina vwandaka nzutu ya Yandi ya nkembo.” Yina bulaka ve ngunga.

Kasi ntangu mu kotaka na kivinga mpe bandaka na kusambila, Yandi bikaka mu zaba yinki ya vwandaka. Beno me mona?

¹⁶⁰ Mu ke longaka ntangu nyonso ti Yandi vwandaka Bunzambi, muntu ve. Yandi vwandaka Nzambi yina talanaka na nsuni: Nzambi, kinama ya Nzambi, ya zola; binama ya nene yina me kulumuka, yina me talisama awa na zulu ya ntoto, ya Nzambi. Yesu vwandaka zola ya Nzambi, yina tungaka nzutu yina Yehowa Yandi mosi zingaka. Yandi vwandaka muvimba ya Bunzambi na nzutu. Yina Nzambi vwandaka, Yandi monisamaka na nzila ya nzutu yina. Nzutu yina zolaka kufwa, na yawu Yandi zolaka sukula Kento ya makwela na—na Menga ya Yandi—ya Yandi.

¹⁶¹ Mpe beno tala, ya kele kaka ve Kento ya makwela yina ba sukulaka, yina ba me lemvokila, kasi Yandi me nungisama. Beno

me mona? Beno me mekaka ntete mpova ya *kunungisama*, na kumona yinki ya zola kutuba?

Ntangu yayi, mutindu, kana Mpangi Green kuwaka ti mu vwandaka kunwa, mu vwandaka sala bima ya yimbi, na manima yandi monaka ti mu salaka yawu ve, na manima yandi kwisaka, yandi tubaka, “Mu ke lemvokila nge, Mpangi Branham.”

¹⁶² “Beno lemvokila munu? Ata mbala mosi ve ti mu me salaka yawu. Samu na yinki beno ke lemvokila munu?” Beno me mona? Kasi kana mu zaba dyambu, na yina ba lenda lemvokila munu; kasi mu kele kaka ve ya kudedama, samu ti mu salaka yawu.

Kasi mpova ya *kunungisama* kele “ata ti beno me salaka yawu ata fioti ve, ata fioti ve.” Ya me nungisama! Mpe kuna Menga ya Yesu Klisto ke sukula beto mingi na disumu, tii ya ke tulama na kati ya Buku ya kuzimbana ya Nzambi. Yandi kele Yandi yina kaka lenda sala yawu.

¹⁶³ Beto lenda ve. Beto lenda lemvokila kasi kuzimbana ve. Mu lendaka lemvokila beno, kasi mu ke bambuka moyo ti beno salaka bima yayi ya yimbi. Na yina, beno kele ya *kunungisama* ve; ba me lemvokila beno.

Kasi, na meso ya Nzambi, Kento ya makwela kele ya *kunungisama*. Yandi salaka yawu ata fioti ve, na kisika ya ntete. Amen. Ya kutelama kuna, ya kukwelana na Mwana ya Nzambi ya kuvedila; ata mbala mosi ve sumukaka, na kisika ya ntete. Samu na yinki? Ba soolaka yandi na ntwala. Yandi vwandaka me bakama na mutambu na yayi. Mpe ntangu yayi ntangu Yandi kuwaka Kieleka mpe basikaka, Menga sukulaka Yandi. Mpe Yandi me telama kuna, ya kuvedila. Beno me mona? Yandi, disumu mosi ve na zulu ya Yandi, ata fioti ve.

¹⁶⁴ Na yawu, Nsangu ke bokilaka Kento ya makwela kintwadi, beno me mona, kuboka.

Mpe mpungi. . .

Yandi yina mosi, Yandi, na ndinga ya ngolo, Yandi bokaka na kuboka yina mpe ndinga, mpe vumbulaka Lazare. Na ndinga ya ngolo Yandi bokaka, “Lazare, basika.” Beno me mona? Mpe ndinga ke vumbuka—ke mata Kento ya makwela ya kulala, ya kulala.

¹⁶⁵ Mpe mpungi, “na muningu ya mpungi.” Mpe, ntangu ya ke salama, ya ke bokila. Ntangu nionso, mpungi ke bokila Israel na Feti ya Bampungi. Beno me mona? Na yina, vwandaka Feti ya pentecote, Feti ya nene na zulu; mpe Feti ya Bampungi. Mpe, ntangu yayi, mpungi ke tubaka ti ba ke bokila kintwadi, “Beno kwiza na Feti.” Mpe ntangu yayi yina kele Madia ya Mwana-dimeme na zulu.

Ntangu yayi beno tala mbote: Kuvukana kintwadi; mpe Kento ya makwela; Feti ya Bampungi; Madia ya Makwela. Beto me mona yawu na bifwanukusu. Ntangu yayi beno tala mbote-

mbote mwa ntangu fyoti ntete beto sukisa. Beno tala. Beto me mona yawu na bifwanukusu.

¹⁶⁶ Ntangu yayi, kana beno zola kutanga na Matthieu 18:16, Ya tubaka, “Ya kele na tatu yina ke pesaka kimbangi,” beno me mona, na Santu. . . na Jean ya Ntete 5:7, nyonso yankaka yina. Tatu kele ntangu nyonso mhangi. Ya kele kieleka? Ya kele kimbangi, kima yina kele kieleka. Bambangi tatu ke nataka. “Na yinwa ya bambangi zole to tatu, ti dyambu nyonso kundimama.”

¹⁶⁷ Ntangu yayi beno tala. Beto me kuzwa bambangi tatu. Tatu kele mhangi. Ntangu yayi, beto me kuzwa yimeni bayinza tatu na Ngwisani ya Ntama. Beno me zaba yawu? Mutindu mhangi. Ntangu yayi beno tala mbote. Enoch vwandaka mosi; Elie vwandaka yankaka; mpe Yesu vwandaka yina yankaka.

Yesu, na kuvwandaka Ditadi ya ngudi, ntangu yayi, Yandi vwandaka pesa kimbangi. Beno me mona? Yandi vwandaka Ditadi ya ngudi na kati-kati ya Ngwisani ya Ntama mpe ya Malu-malu, samu ti Yandi zolaka kufwa ntete mpe na manima enlevement. Yandi kufwaka; kwizaka na luzingu mpe tambulaka awa na beto; mpe na manima zangukaka. Samu ti, Yandi vwandaka Ditadi ya ngudi yina kangaka nyonso zole kintwadi. Na manima ya mvumbukulu ya Yandi mpe enlevement. . . Beno tala. Na manima Yandi salaka yawu, mpe siamisaka ti, Ngwisani ya Ntama kuna. Beto nyonso zaba ti ba zangulaka Enoch. Beto zaba ti ba zangulaka Élie na kitembo, ya kele kieleka, na kipusu ya Tiya. Mpe Yesu kufwaka, ba zikaka Yandi, vumbukaka mpe zingaka awa na zulu ya ntoto, mpe na manima ba zangulaka yandi, Ditadi ya ngudi. Ya kele na tatu, samu na kupesa kimbangi. Ya kele kieleka?

¹⁶⁸ Ntangu yayi, ya me luta yimeni enlevement. Beno zaba yawu? Ti, beto mona kana beto lenda tanga yawu ve, kaka na nswalu. Beto baka Matthieu, kapu ya 27. Mpe beto baka nzila ya 45 ya Matthieu, kapu 27. Beto tala kana beto lenda ve kubaka yawu na nswalu nyonso, mpe kumona kana—kana beto lenda ve kuzwa kaka mwa fyoti na yayi, ke sadisa beto, na nswalu nionso. 27:45, mu banza, mu me sonika yawu awa. Beto tanga.

Ntangu yayi kubanda ngunga ya sambanu mudidi vwandaka na zulu ya ntoto ya muvimba tii na ngunga ya yivwa . . .

Mpe pene ya ngunga yivwa Yesu bokaka na ndinga ya ngolo, na kutubaka, Eli, Eli, lama sabach- . . . ? yina zola kutuba, . . . Nzambi ya munu, samu na yinki nge me yambula munu?

Bayankaka na kati ya bawu yina vwandaka pene-pene, . . . kufwaka yawu, mpe tubaka, Muntu yayi ke bokila . . . Elie.

Mpe na mbala mosi mosi na kati ya bawu kimaka mbangu, mpe bakaka kitende, mpe fulusaka yawu na

vinaigre, mpe tulaka yawu na zulu ya madiadia, mpe pesaka yawu na yandi na kunwa.

Bayankaka tubaka, . . . beto tala kana Elie ke kwisa mpe ke vulusa yandi.

Yesu, ntangu yandi bokaka . . . na ndinga ya ngolo, yandi kufwaka . . .

“Ndinga ya ngolo.” Ndinga ya ngolo! Beno tala mbote.

Ntangu Yesu, vwanda kufwa, vwanda boka na ndinga ya ngolo, yandi kufwaka.

Mpe, tala, vwale ya tempelo pasukaka na bitini zole kubanda na zulu tii na yisi; mpe ntoto kuninganaka, mpe matadi pasukaka;

Mpe bantoni zibukaka; mpe mingi ya banzutu . . . basantu yina vwandaka ya kulala vumbukaka na lufwa,

Mpe basikaka na bantoni na manima ya mvumbukulu ya yandi, mpe kotaka na mbanza ya santu, mpe monikaka na bantu mingi.

169 Enlevement me luta.

Tatu me salama na Ngwisani ya Ntama, ya bawu ba me yidika, na nani Ndinga ya Mfumu me kwiza. Beno me mona? Ndinga ya Mfumu kwizaka na Enoch. Ndinga ya Mfumu kwizaka na Élie, profete ya Yandi. Beno me mona? Ndinga ya Mfumu vwandaka Yesu. Beno me mona?

170 Beno tala mbote na Ngwisani ya Ntama, basantu ya Ngwisani ya Ntama ntangu yayi, ntangu enlevement yayi ya ntete kusalamaka. Beno tala nzila ya 50. Ndinga ya Yandi ya ngolo ke vumbuka basantu ya Ngwisani ya Ntama kaka kieleka mutindu ndinga ya ngolo vumbulaka Yesu . . . to vumbulaka Lazare. Beno me mona? Ndinga ya ngolo vumbukaka.

Mpe ya zole me salama na ba-Théssalonicien ya Zole, kapu 4. Beto tanga kaka, beto tanga yawu. Beto ke tanga kaka, baminuti fyoti me luta. Beno me mona?

. . . Mu zola ve ti beno . . . yina zaba kima ve, bampangi, samu na bayina . . . ya kulala, ti beno vwanda na kiadi ve, ata mpe . . .

Ya kele ya Ntete ya Thessaloniens 4:12 na 18. Ti, ya ke vwanda Enlevement ya zole. Enlevement ya zole ke vwanda kuzanguka ya Kento ya makwela.

171 Basantu ya Ngwisani ya Ntama me kwenda na Mvwandulu ya Yandi, na paladiso me kwenda. Mpe basantu ya Ngwisani ya Ntama zangukaka, na ndinga ya Yandi ya ngolo, ntangu Yandi bokaka mpe kufwaka; samu (samu na yinki?) Munkayulu, munkayulu ya masumu ya bawu, ti bawu vingilaka, na kukwikilaka ti Mwana-dimeme yina ya kulunga vwandaka kwiza. Bawu pesaka Munkayulu, Mwana-dimeme. Mpe ntangu

Yandi kufwaka mpe pesaka moyo, Yandi bokaka na ndinga ya kupesa musiku, mpe basantu ya Ngwisani ya Ntama vumbukaka.

Beno tala mbote kuboka mpe ndinga na lweka awa, kima mutindu mosi na Nkwizulu ya Yandi. Beno me mona?

“Yandi me bika mpeve.” Mpe ntangu Yandi salaka yawu, Munkayulu vwandaka ya kulunga, mpe ba katulaka paladiso. Mpe basantu ya Ngwisani ya Ntama kwizaka dyaka na ntoto, tambulaka na zulu ya ntoto, mpe kotaka na Yandi, na enlevement ya Yandi.

¹⁷² David tubaka, kuna, “Beno zanguka, beno mielo ya seko; mpe beno zanguka.” “Yandi katulaka bampika na kimpika, pesaka makabu na bantu,” mpe basantu ya Ngwisani ya Ntama kotaka na Yandi.

¹⁷³ Bawu tubaka, “Nani kele Ntinu yayi ya ludedomo?”

¹⁷⁴ “Mfumumu ya Nkembo, ya ngolo na kati ya bitumba.” Makesa ya ngolo, bawu yayi me kwisa awa, ke tambula. “Yesu katulaka bampika na kimpika,” mpe Yandi yayi me kwiza, na basantu ya Ngwisani ya Ntama. Mpe kotaka na mielo ya malu-malu kuna na zulu, mpe tubaka, “Beno zanguka, beno mielo ya seko; mpe beno zanguka; mpe ti Ntinu ya Nkembo kukota.”

Ndinga basikaka na kati, tubaka, “Nani kele Ntinu ya Nkembo?”

¹⁷⁵ “Mfumumu ya ngolo na bitumba.” Mielo zibukaka. “Mpe Yesu, Munungi, katulaka bampika na kimpika,” bayina kwikilaka na Yandi, mpe Ndinga kwizaka na bawu. Kuna, basantu ya Ngwisani ya Ntama vwandaka ya kulala na kati kuna, vwandaka vingila, “Yandi nataka bampika na kukatulaka na kimpika; mataka na Zulu,” bakaka basantu ya Ngwisani ya Ntama mpe kotaka. Ya kele na Enlevement mosi, me luta yimeni.

¹⁷⁶ Enlevement ke landa kele (Ba-Thessalonicien ya Zole) samu na Dibuundu, Kento ya makwela samu na kuvumbuka, samu na kuzanguka na Nkembo. “Beto yina kele moyo mpe ke bikana,” ya kele banzutu yina me bikana na zulu ya ntoto, “ke tekila ve to ke kanga bawu nzila ve bayina kele ya kulala. Samu ti mpungi ya Nzambi ke wakana ntete, mpe bantu ya kufwa na Klisto ke vumbuka.” Beno me mona? “Mpe beto yina ke zinga mpe ke bikana ke zanguka kintwadi na bawu.”

¹⁷⁷ Kilumbu yina, mu vwandaka ya kutelama na nsongi ya bala-bala. Mpe mu vwandaka ya kutelema kuna—mu vwandaka ya kutelema kuna na nsongi ya bala-bala mpe mu vwandaka tala defile ya Kilumbu ya Armistice. Mpe ntangu yandi mataka, yandi mataka na bala-bala, mu vwandaka ya kutelama kuna na mwana ya munu ya bakala, Joseph. Ntete, yina kwisaka, vwandaka ba-tank ya ntama ya mvita ya ntete lutaka, mwa ba-tank ya fioti ya ntama. Na manima ya yina kwisaka ba-tank ya

nene ya Sherman ya mvita ya malu-malu, mpe ba-canon ya nene na bayinwa ya bawu ya tiya, bayinwa ya tiya na zulu ya yawu, mpe nionso yina.

Na manima ya yina, kwisaka basoda; bamama ya Mbwetete ya Wolo. Mpe na manima ya yina kwisaka char na . . . na zulu kuna . . . Mbote, kuna kwizaka char, mpe na ntwala ya yawu vwandaka sanduku ya mvumbi, “samu na kubambuka moyo ya soda yina me zabana ve.” Mpe soda mosi vwandaka ya kutelama kuna, mukengi ya sanduku yango. Ya vwandaka na marin mosi na munduki ya kutelama kuna na simu yankaka, mpe marin mosi na simu yina yankaka. Mpe ba sonikaka lombilu mosi. Mpe na lweka yankaka yina vwandaka mama ya Mbwetete ya Wolo. Yandi zimbisaka mwana ya yandi ya bakala. Kento mosi ya ntwenia vwandaka ya kutelama kuna, na yintu ya yandi na zulu ya mesa mosi, yandi vwandaka dila. Mwana-bakala mosi ya fioti yina vwandaka na bilele ya kubeba vwandaka na lweka; mpe masa ya meso vwandaka basika na kizizi ya yandi. Yandi zimbisaka papa ya yandi.

Mu banzaka, “Mawa yayi! Mu me telama awa mpe ke tala, mu me mona bawu, biboba, kaka mwa basoda me kwenda; na kutambulaka kuna, kikata mpe kiboba, mutindu yina, na ba-uniforme yina, kasi vwandaka talisa bawu mpasi samu bawu vwandaka ba-Americanin.”

Mu banzaka, “Oh, Nzambi ya munu!”

¹⁷⁸ Kilumbu mosi, ya ke vwanda na kupasuka ya Mazulu, “Mpe bantu ya kufwa na Klisto ke vumbuka ntete na lufwa.” Basantu ya Ngwisani ya Ntama kuna, yina ke na kuvingila, ke samuna mpe ke basika kuna ntete, mpe ke kota na mvumbukulu. Beto ke baluka na ndonga, na kukwendaka na zulu; banzutu yayi ya ntama yina ke kufwa sobaka mpe ke kuma mutindu nzutu ya Yandi Mosi ya nkembo. Wapi—wapi mutindu ya defile ya ke vwanda ntangu ya ke banda na zulu, mosi ya bilumbu yayi, na ntangu ya enlevement yina kele na ntwala, oh, na kuzolaka kutalisa Menga ya Yesu Klisto na zulu ya ntulu ya bawu, Nsangu ya Nzambi na ngunga yina ba vwandaka zinga. Ya kele ngunga yina beto ke na kuvingila, mpangi.

¹⁷⁹ Beno tala, kaka samu na kumanisa ntangu yayi. Mvumbukulu ya zole, nionso . . . Ya ntete me luta. Ya zole kele pene-pene, kaka ntangu yayi, ke kuma pene-pene ntangu yayi.

¹⁸⁰ Ntangu yayi, ya tatu kele bambangi zole ya Apocalypse 11:11 mpe 12. Na yina, bayayi kele bayina ke vutuka, na Mpeve ya Klisto, samu na kupesa kimbangi na ba-Juif, mutindu Joseph salaka na bampangi ya yandi. Mpe beno bambuka moyo, “Banzutu ya bawu ya kufwa vwandaka ya kulala na bala-bala, bilumbu tatu mpe ndambu. Na yina mpeve ya luzingu kwisaka na kati ya bawu, mpe ba zangukaka, ba zangulaka bawu na Mazulu.”

Beno tala ba-enlevement tatu ya beno na Ngwisani ya Malu-malu.

Ba-enlevement tatu ya Ngwisani ya Ntama; bawu nyonso me luta.

¹⁸¹ Ntangu yayi beto me kubama, na kuingilaka na enlevement, Enlevement ya basantu. Ba me zonzila yawu, mpe ya ke vwanda mutindu yina. Ntangu Nzambi me tuba kima mosi, “Mazulu mpe ntoto ke luta, kasi Ndinga yina ke kubwa ata fioti ve.”

¹⁸² Ntangu Nzambi tubaka, kuna na Genèse 1, Yandi tubaka, “Ti nsemo kuvwanda,” mpe ya zolaka vwanda bankama ya bamvula ntete ti nsemo kuvwanda. Yandi tubaka, “Bika ti ya vwanda na yinti ya diba. Bika ti ya vwanda na yinti ya chène. Bika ti ya vwanda na ntoto ya kuyuma. Bika ti ya vwanda na mongo. Bika ti ya *yayi* vwanda.” Yandi zonzaka yawu, beno me mona. Mpe ntangu nyonso yina ya basikaka na yinwa ya Yandi, na Ndinga, ya fwana monisama. Ya fwana vwanda. Ntangu . . .

¹⁸³ Na yina kilumbu mosi, Yandi bokilaka bantu ya Yandi na kubasika. Mpe Yandi zonzaka na muntu na nkumbu ya Moise, na nzila ya Dikunzi ya Tiya, Nsemo; Tiya ya Santu, ya Santu. Mpe Moise lendaka ve . . . Bantu vwandaka kwikila Moise ve, na yina Yandi tubaka, “Beno basisa bawu na mongo yayi.”

¹⁸⁴ Na suka yina, mongo vwandaka nyonso ya kufuluka na Tiya, mpe bansemo ya banzasi mpe banzasi mutindu yina. Mpe bantu tubaka, “Bika ve Nzambi kuzonza. Bika ti Moïse kuzonza,” beno me mona, “samu ti beto kufwa ve.”

¹⁸⁵ Nzambi tubaka, “Mu ke zonza dyaka ve na bawu mutindu yayi, kasi Mu ke telemisa bawu profete. Mpe mu ke zonza na nzila ya yandi, mpe yina yandi ke tuba ke salama. Na yina, beno ke kuwa Yawu, samu ti mu kele—mu kele na yandi.” Ntangu yayi, Yandi zonzaka yawu. Yandi tubaka ti ya ke salama.

¹⁸⁶ Beno tala profete yayi, Ésaïe, vwandaka ya kutelama kuna; muntu mosi, muntu ya mayele, muntu mosi vwandaka banza, mbote, na nzila ya ntinu, samu yandi zingaka na Osias. Ntinu, yina vwandaka muntu ya nene, yina mekaka na kubaka kisika ya longi, kilumbu mosi, mpe yandi kotaka, ba bulaka yandi na lèpre.

Mpe ya kele yina mu tubaka na bantu ya mumbongo. Beno meka ata fioti ve na kubaka kisika ya longi. Ve, tata. Beno vwanda kaka kisika beno kele. Beno me mona? Beno ke sala kisalu ya beno, yina Nzambi tulaka, tubaka na beno na kusala. Kana beno kele musapi, beno lenda vwanda ata fioti ve dikutu. Kana beno kele dikutu, ata mbala mosi ve ti beno ke vwanda mbombo, mbombo to disu. Beno me mona? Beno vwanda na kisika ya beno.

¹⁸⁷ Beno kuwaka Nsangu yina, kilumbu yina, na nsamunu: *Kumeka Kusadila Nzambi Kisalu*. David, ntinu ya kupakulama.

Bantu nyonso vwandaka boka mpe vwandaka boka, “Ya vwandaka kieleka.” Kasi yandi yufulaka ata mbala mosi ve profete ya Nzambi. Mpe muntu kufwaka, mpe kima nyonso vwandaka ya kubeba. Beno meka ve na kusala lemvo na Nzambi. Beno vingila tii ya kele ntangu ya Nzambi. Beno bika yawu kota na mutindu ya Yandi ya kusala yawu. “Mu ke banda kima *yayi* ya nene. Ya ke sala *yayi*.” Beno sala keba, mpangi.

¹⁸⁸ Ntangu yayi, David zabaka mbote mingi kulutila yina. Nathan vwandaka na yinsi, na kilumbu yina. Yandi vwandaka kwandi ve ya kuyufula, ata fyoti ve. Beno me mona? Yandi yufulaka bamfumu ya bankama mpe mafunda. Bantu nyonso bokaka, mpe bokaka, mpe binaka. Na kisika ya...Bawu vwandaka na misambidi nyonso yina vwandaka sala, kasi ya vwandaka ve na nzila mpe samu na ndonga ya Ndinga ya Nzambi, mpe ya kubwaka.

Nyonso yankaka, kele ve na nzila mpe samu na Ndinga ya Nzambi, ke kubwa. Kaka Ndinga ya Nzambi ke telama ntangu nyonso. “Mazulu mpe ntoto ke luta, kasi Ndinga ya Munu ve.”

¹⁸⁹ Beno tala Esaie, ntwenya ya bakala yina ya mayela vwandaka ya kutelama kuna. Na mbala mosi, Mpeve vwanda bula yandi. Yandi zolaka tuba ata luswaswanu ve. Yandi vwandaka profete. Yandi tubaka, “Tala, mwense mosi ke kuzwa kivumu.” “Samu na beto Mwana me butuka; Mwana me butuka, Mwana me pesama. Ba ke bokila Yandi Konseye, Ntinu ya Ngemba, Nzambi ya Ngolo nionso, Tata ya Kukonda nsuka. Nsuka ya . . . Luyalu ya Yandi ke vwanda na zulu ya mapeka ya Yandi. Nsuka ya . . . Ya ke vwanda ve na nsuka na kimfumu ya Yandi.” Wapi mutindu muntu yina na mayele lendaka tuba ti mwense yina me kuzwa kivumu?

Muntu nyonso vwandaka sosa yawu. Ba zonzaka yawu. Ya vwandaka MUTINDU ME TUBA MFUMU. Ya zolaka salama, samu ti ya vwandaka Ndinga ya Nzambi. Mutindu mosi ya vwandaka na Genèse, ntangu Yandi kunaka bankuna yina na yisi ya mubu, kisika “ya vwandaka na mutindu ve, mpe ya mpamba; mpe maza vwandaka na kati ya mudindu.” Beno me mona? Ya zolaka salama. Mpe kilumbu mosi, bankama nana ya bamvula na manima, kivumu ya mwense kuzwaka kivumu Nkuna ya Nzambi, Nkuna ya kuvanga. Yandi butaka Mwana.

¹⁹⁰ Mwana yina mosi telamaka kuna, kilumbu mosi. Yandi tubaka, “Lazare, basika.” Mpe muntu yina kufwaka bilumbu yiya, ya kupola, mbombo ya yandi ya kufyetamana, ya bitini-bitini, yandi basikaka. Yandi tubaka:

*Kuyituka ve samu na yayi: samu ngunga me kwisa,
(Amen.) ntangu nionso yina kele na ntoni ke kuwa
ndinga ya Mwana ya Nzambi,*

Na yawu, ba zonzaka yawu. Ya fwana salama mutindu yina. Ya ke vwanda na Enlevement. Oh, la la!

¹⁹¹ Mu ke bambuka moyo, kaka Nsangu ya munu ya nsuka na Californie, kisika mu banzaka ti mu ke vutuka diaka ve, ntangu mu zabisaka na ntwala, “Los Angeles ke kulumuka na nsi ya mubu. MUTINDU ME TUBA MFUMU.” Ya ke vwanda mutindu yina. Yandi me suka. Yandi me beba. Yandi me zimbana. Wapi ngunga? Mu zaba ve wapi ntangu, kasi ya ke vwanda na mwini. Kaka na manima ya yina, kuningana ya ntoto bandaka na kuningana mpe kufukama.

¹⁹² Beno bambuka moyo, mingi na kati ya beno babakala yina kele ya kutelama kaka kuna, ditadi yina, kilumbu yina ntangu Wanzio yina kulumukaka kuna. Mpe Nsemu yango mpe Tiya kubwaka na Mazulu, na ziunga ya ditadi kisika beto vwandaka ya kutelama kuna. Matadi basikaka na bamongo, mpe kubwaka kuna. Yandi bokaka bambala tatu, na ngolo. Mu tubaka, “Lufundusu ke kubwa na Simu ya Wesete.” Bilumbu zole na manima ya yina, Alaska zolaka kudinda.

¹⁹³ Beno bambuka moyo, Nzambi mosi yina tubaka ti, tubaka, “Los Angeles me suka.” Mpe yandi me suka. Mu zaba ve wapi ntangu. Mu lenda tuba na beno ve.

¹⁹⁴ Mu zabaka ve ti mu tubaka yawu. Kasi mpangi ya bakala yayi awa, mu banza ti ya vwandaka . . . Ve. Mosi ya ba-Mosely, mu banza, yina vwandaka na munu kuna na bala-bala. Mu zabaka ve yinki ya vwandaka tii mu talaka na manima. Mu talaka na manima na Masonuku.

Mpe Yesu tubaka, “Capernaüm, Capernaüm, bambala yikwa . . . Nge yina me zanguka nge mosi . . .” (na kisika) “. . . tii na Zulu, ba ke nata yandi na difelo. Samu kana bisalu ya ngolo yina me salama na kati ya beno, me salama na Sodome, yawu ke vwanda bubu yayi.” Mpe pene ya bamvula nkama mosi na makumi tanu me katuka kuna, (Sodome kuzwaka yimeni, na ntoto) na yina Capernaüm kele na masa, diaka, bubu yayi.

¹⁹⁵ Mpe Mpeve mosi yango ya Nzambi yina tubaka bima nyonso yayi, mpe salaka bima nyonso yayi, Yawu tubaka kuna, “Oh, mbanza, Capernaüm, yina bokilaka nge mosi na nkumbu ya Bawanzio, Los Angeles, wapi mutindu beno me zanguka beno mosi na mazulu! Nsimbulu ya kieleka mpe kiti ya Satana,” (Beno me mona?) “beno me zanguka beno mosi.”

¹⁹⁶ Milongi, ya kele maziama samu na bawu. Babakala ya mbote ke kwendaka kuna mpe ke kufwa mutindu bampuku. Wapi diambu ya mpasi yayi!

¹⁹⁷ “Beno bayina ke bokilaka beno mosi na nkumbu ya Bawanzio; kana bisalu ya ngolo me salama na Sodome, yina me salama na kati ya beno, yawu me telema bubu yayi. Kasi ngunga ya beno me kwisa.”

Beno tala mbote mpe beno mona. Kana ya kele ve, mu kele profete ya luvunu. Beno me mona? Yandi yayi. Yandi kele ya kulala kuna.

¹⁹⁸ Mu ke bambuka moyo na nkokila yina, ntete mu mona yawu, mu monaka ya ntete ya Kento ya makwela. Mu telamaka kuna mpe monaka mwa mama mosi ya kitoko, ya kulwata mbote-mbote, mpe nyonso, kutambula mutindu *yayi*. Ya vwandaka na Muntu yina vwandaka ya kutelama pene-pene ya munu, na vision. Mpe mu monaka. Ba tubaka, “Na ntwala ya Kento ya makwela.” Mu monaka Yandi ke kwenda. Bawu me kwiza na lweka *yayi*, mpe me kwenda bisika nyonso.

¹⁹⁹ Mu kuwaka ti ya ke mata, mabuundu ke basika na lweka *yayi yankaka*. Kuna me kwiza dibuundu ya Asie. Oh, beno ke zonzila na yina me tala mvindu! Awa me kwiza dibuundu ya Europe. Oh, la la! Mpe na manima mu kuwaka rock-and-roll, mpe ya vwandaka Miss Amerique, dibuundu, mpe yandi vwandaka ve na bilele. Yandi vwandaka na mikanda, mutindu bazulunale ya bansangu, na bansuki ya mpembe, yina vwandaka na ntwala ya yandi, vwandaka kina na rock-and-roll; Mademoiselle Amerique, dibuundu.

²⁰⁰ Mu telemaka kuna na Mvwandulu ya Yandi. Mu banzaka, “O Nzambi, mutindu longi, kana ya kele ya kulutila mbote yina beto lenda sala? Oh! Oh!” Beno zaba mutindu beno ke kuwa. Na yina mu banzaka, “Nzambi, bumba munu. Kana mu lendaka kaka kuzimbana awa. Kana nyonso yina beto me sala, mpe ya kele yina beto fwana basisa, kana ya kele yina?”

²⁰¹ Mpe kuna ntangu bakento yina lutaka, bawu nyonso vwandaka ninga-ningana mpe nyonso, na bansuki ya nkufi, mpe bizizi ya kupakula. Mpe na yina bawu vwandaka luta mutindu yina, ya fwana vwanda bamwense samu na Klisto. Mpe ntangu yandi lutaka mutindu yina, mu balulaka yintu ya munu, beno zaba, na kusimbaka *yayi* na ntwala ya munu. Ya vwandaka—ya vwandaka nsoni mingi, na kutala mukongo ya bawu. Mpe kuna bawu vwandaka, ba vwandaka kwenda mutindu yina. Mpe mu balulaka yintu ya munu, samu na kudila, mutindu *yina*.

²⁰² Mu tubaka, “Mu—mu lenda ndima yawu ve na kati kuna. Yandi vwandaka ya kutelama kuna, mpe mu zaba ti munu, longi ya Dibuundu, mpe yawu yina mu basisaka samu na Yandi.” Mu tubaka, “O Nzambi, mu lenda tala yawu ve. Bika mu kufwa. Bika mu—bika mu zimbana,” mpe mutindu yina.

²⁰³ Mpe kaka na ntangu ya kwendaka, ntangu nionso mosi ya bawu vwandaka kwiza, ya vwandaka kwenda na kisika mosi, mpe vwandaka zimbana na nsi. Mu vwandaka ve kuwa makelele yina ya vwandaka sala ntangu ya vwandaka kwenda.

Na yina mu kuwaka kima mutindu *Na Ntwala, Basoda Ya Baklisto*. Mu talaka, mpe awa me kwiza nkonga ya mwa bana ya bakento ya santu kaka kieleka mutindu bawu vwandaka, ya kulwata mbote-mbote, bansuki ya bawu vwandaka kulumuka na mukongo ya bawu. Ya lembami, ya bunkete, ba vwandaka tambula mutindu *yayi*, landila dikulu ya Nsangu ya mbote.

Yandi vwandaka Ndinga. Bawu vwandaka talana mutindu mosi na bayinsi nyonso. Mu vwandaka tala yawu na yina bawu vwandaka luta, mpe monaka yawu kuluta. Na kisika ya kukwenda, bawu bandaka na kumata.

Mu talaka mosi ya bawu vwandaka meka, zole to tatu ya bawu vwandaka meka, na kubasika na nzila. Mu bokaka, “Vwanda na ndonga!” Mpe vision bikaka munu. Mpe mu vwandaka ya kutelama na kati ya kivinga, vwandaka boka, “Vwanda na ndonga!” Nsinga, yina . . .

²⁰⁴ Mu ke kumiyufula, ya lendaka luta yimeni? Kento ya makwela lendaka vwanda yimeni ya kubokila? Ya kele yina beto ke na kuluta bubu yayi?

Yandi fwana vwanda ya kusala mpe ya kusala na kifwani ya Klisto, mpe Klisto kele Ndinga. Ya kele kaka kima mosi. Beno me mona? Ya kele na kati Kuna, na kati ya Ndinga. Ya kele lu- . . . Beno me mona? Ya lenda vwanda ve na kima mosi yina ba me bwela. Ya lenda vwanda ve kento mosi na diboko mosi mutindu bakala, mpe diboko yankaka na ntulu mutindu yimbwa. Ya fwana vwanda kieleka Ndinga ya Mfumu, mutindu Yandi kele Ndinga. Kento ya makwela kele kitini ya Bakala ya makwela. Kento kele kitini ya bakala ya yandi, samu ti ba me katula yandi na bakala ya yandi. Ève vwandaka kitini ya Adam na lweka ya yandi. Mpe mutindu mosi kele Kento ya makwela, yina me katuka na denomination ve, kasi me baka na ntulu ya Ndinga ya Nzambi samu na kilumbu yayi.

²⁰⁵ Enlevement!

Mpungi ya Mfumu ke wakana, bantu ya kufwa
na Klisto ke vumbuka,
Mpe nkembo ya mvumbukulu ya Yandi ke na
kukabula;
Ntangu bayina ba soolaka ke vukana na Yinzo
ya bawu na zulu.
Ntangu ba ke baka rulo na zulu kuna, beto
nyonso meka na kuvwanda Kuna, bankundi.

²⁰⁶ Nzambi sakumuna beno. Ba me zonza yawu, ya fwana salama, ya ke salama. Mpe mwa . . . [Kisika ya mpamba na bande—Mu.]

Bantu, muntu ve zola kufwa. Muntu ve zola ku—kuzimbana. Bika mu tuba na beno. Nionso yina beno ke sala . . . Mu ke kipe ve wapi mutindu beno ke kwenda na yinzo-Nzambi, mpe wapi mutindu beno kele ya kwikama na yinzo-Nzambi. Ya kele mbote; mu ke telemina yawu ve. Beno fwana kwenda na yinzo-Nzambi. Beno sala yawu. Beno landila na kukwenda na yinzo-Nzambi. Kasi, nyonso yina, beno losa kaka binkulu ya beno, mpe beno kwenda mbala mosi na Klisto. Samu, ya ke wakana mosi ya bilumbu yayi, mpe ba ke kanga beno kidimbu ya kibulu na zulu

ya beno, mpe zaba ve yinki ya kele tii ntangu me luta mingi. Ya kele kaka kieleka.

²⁰⁷ Nzambi sakumuna beno. Mu ke na kiadi na kuvwanda ya kukanga beno. Mpe beno bambuka moyo. Mu me baka bawu ntangu ya yinda awa. Ya kieleka. Mpe dikabu yina beno lokotaka samu na munu. . . Na yina, mu lombaka beno ve na kusala yawu, mpangi-bakala. Ya kele, oh, la la, yina kele bayinzo ya lusambusu. Beno baka yawu mpe beno futa motel yayi samu na ngunga me luta, samu ti mu me bumba yawu. Mu vwandaka kaka na mwa bima awa. Mu kele diaka na ba-page nana to kumi na zulu ya Enlevement yina kuna, kasi mu—mu vwandaka ve na ntangu ya kupesa yawu. Nzambi sakumuna beno.

²⁰⁸ Beno zola Mfumu Yesu? Beto telama kaka mwa ntangu fyoti ntangu yayi, na malembe, na buzitu nyonso, mpe beno bambuka moyo na yina mu me tuba. Beno bambuka moyo, beto kele na bangunga ya nsuka.

Bayinsi yayi ke na kupanzana, Israel ke na kuvumbuka,
Bidimbu yina Biblia zabisaka na ntwala;
Bilumbu ya Bantu ya makanda me tangama,
me fuluka na boma;
“Vutuka, O nge yina me zimbana, na yina ya nge.”

Kilumbu ya mpulusu me belama,
Bantima ya bantu ke na kubwa na boma;
Beno vwanda ya kifuluka na Mpeve, minda ya beno ya kuyilama mpe ya kutsyema,
Beno tala na zulu! Mpulusu ya beno me belama.

Beno zaba yawu?

Baprofete ya luvunu ke na kuvuna, ba ke manga Kieleka ya Nzambi,

Beto zaba ti nionso kele kieleka. Mutindu yina ve? [Kisika ya mpamba na bande—Mu.]

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

²⁰⁹ Bantu yikwa ya kieleka ke zolaka Yandi? Beno telemisa diboko ya beno. Ntangu yayi, mu zola beno, na yina beto ke yimba dyaka yayi, beno pesana maboko na muntu pene-pene ya beno. Beno tuba, “Nzambi sakumuna nge, kiziyeti.” Beto kele biziyeti. Mutindu yina ve? Biziyeti mpe nzenza.

Mu zola Yandi,
Yawu yina, kaka na lweka ya mesa.

Mu zola Yandi
 Samu Yandi zolaka munu ntete
 Mpe futaka mpulusu ya munu
 Na yinti ya Calvaire.

²¹⁰ Beno zola Enlevement? Bantu yikwa ke sepela na Enlevement? Beno tuba, “Nzambi, mu zola kusala yawu, na ntima ya munu ya muvimba.”

Simba Diboko ya Nzambi Ya Moyo Yina Ke Sobaka Ve, beno zaba nkunga yina? Beno zaba yawu, mpangi ya kento? *Simba Diboko ya Nzambi Ya Moyo Yina Ke Sobaka Ve*. Mu zaba ve yina. . . Yinki ya kele, samu na yandi yina? Huh?

Kangama na diboko ya Nzambi yina ke sobaka ve!

Kangama na diboko ya Nzambi yina ke sobaka ve!

Tunga kivuvu ya nge na zulu ya bima ya Seko,
 Kangama na diboko ya Nzambi yina ke sobaka ve!

Beno zola yawu?

Ntangu nzyetolo ya beto ke suka,
 Kana na Nzambi beno me vwanda kieleka,
 Yinzo ya beno ya kitoko na Nkembo,
 Moyo ya beno ke yangalala na kumona!

Kangama na diboko ya Nzambi yina ke sobaka ve!

Kangama na diboko ya Nzambi yina ke sobaka ve!

Tunga kivuvu ya nge na zulu ya bima ya Seko,
 Kangama na diboko ya Nzambi yina ke sobaka ve!

Mu zola ti beno kulumusa bayintu ya beno na mwa ntangu fioti ntangu yayi.

Kulula ve bimvwama ya mpamba ya yinza yayi,

Yina ke bebaka na nswalu nionso,
 Beno sosa kuzwa kimvwama ya Mazulu,
 Ata mbala mosi ve ti bawu ke luta!

Kangama na diboko ya Nzambi yina ke sobaka ve!

Kangama na diboko ya Nzambi yina ke sobaka ve!

Tunga kivuvu ya nge na zulu ya bima ya Seko,
 Kangama na diboko ya Nzambi yina ke sobaka ve!

²¹¹ Na bayintu ya beno ya kukulumusa, mpe yayi na dibanza, na kuzabaka ti beto ke kulumusa bayintu ya beto na putulu yina

ba me nata beto, kilumbu mosi beto ke vutuka, na kuzabaka ti beno kele na moyo na kati kuna yina fwana pesa mvutu na Nzambi. Mpe kana beno ke kuwa ti beno me kubama ve samu na Enlevement yina, kana Yawu kwisa na nkokila yayi, mpe beno zola ti ba bambuka beno moyo na kisambu, beno telemisa kaka diboko ya beno. Beto kele ve na kisika ya kusala mbokolo na autel. Autel ya beno kele na kati ya ntima ya beno, na mutindu nyonso. Telemisa diboko ya nge. Nzambi sakumuna nge, nge, nge. Oh!

“Mu ke na kuwa ti mu me kubama ve, Mpangi Branham. Mu—mu, ya kieleka, mu—mu—mu zola vwanda Muklisto. Mu me meka na kuvwanda, kasi ya kele ntangu nyonso na kima ke kondwa. Mu—mu zaba ti mu—mu kele ve kaka kisika mu fwana vwanda.”

“Tala kyadi, Nzambi. Mu me telemisa diboko ya munu. Lemvokila munu.”

Ntangu yayi, mwa maboko makumi zole to makumi tatu me telama, yimani, na mwa kimvuka yayi. Kulutila ke salama.

²¹² Nzambi ya luzolo, Nge zaba yina kele na manima ya diboko yina, kuna na yisi ya ntima. Mu ke sambila, Nzambi ya luzolo. Ya kele kaka na kima mosi yina mu kele na kiyeka ya yawu, ya kele, samu na kutuba Kieleka. Mpe, Nzambi ya luzolo, bawu zola kuzwa mpulusu. Bawu zola, kieleka. Bawu—bawu zola ve kima yayi yina kele kaka mwa emotion, mwa sysiteme mosi ya denomination, credo mosi, dogme yina ba me bwela. Bawu me bakula, Tata, ti ya ke lomba Ndinga ya Nzambi ya kuvedila, ya kukondwa mvindu. Nyonso yankaka ke luta, mpe mazulu mpe ntoto, kasi Yawu ke luta ve. Mpe kana beto kele Ndinga yango, ntoto ke luta na yisi ya beto, kasi beto lenda ata mbala mosi ve kuzimbana, samu ti beto kele Ndinga yango, Kento ya makwela ya Bakala ya makwela.

²¹³ Mu ke sambila samu na mosi na mosi, ti Nge ke pesa bawu, Tata, ya kele kisambu ya munu ya kieleka. Mpe lemvokila munu, Tata, samu ti mu vwandaka ya kudasuka mingi na nkokila yayi, na kudumukaka awa ntama mingi ve, mpe—mpe na kuvwandaka ya kuningana, mpe na kutubaka bampova ya bitini mpe ya kuzenga. Na mutindu mosi na yankaka, Mpeve-Santu ya nene, ke vukisa bawu kintwadi na mutindu ya Nge Mosi ya Kinzambi, mpe me vulusa bawu na bantima ya bantu, na ntima ya munu, mpe mitifi mpe lukanu yina kele na kati ya ntima ya munu mu ke na yawu na ntuala ya Nge. Nge zola ve, Mfumu? Mpe ke vulusa yina lendaka kuzwa mpulusu. Kunata na Nge, Mfumu. Mpe ti beto vwanda ya kukubama samu na ngunga yina ya enlevement yina me kuma ntama mingi ve. Samu ti mu me lomba yawu na Nkumbu ya Yesu. Amen.

Nzambi sakumuna beno.

Ntangu yayi, mfumu ya—ya lukutakanu.



ENLEVEMENT KNG65-1204
(The Rapture)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nkokila, na kilumbu ya 4 ya Ngonda ya kumi na zole, na madia ya lukutakanu ya yinza ya muvimba ya Bantu ya Mumbongo ya Nsangu ya mbote ya Muvimba na Ramada Inn na Yuma, na Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo-Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org